

慎
宜
軒
詩
集

昔桐城姚惜抱先生以辭章之學誘掖後進天下翕然從之而及門之士稱高第弟子者凡四人姚石甫先生其一也石甫先生爲惜抱從孫善爲古今體詩傳其詩學於子曰慕庭先生桐城之弟子多以古文名家至爲詩則稱石甫慕庭兩先生慕庭先生有子曰實仲曰叔節仲實孳究經術叔節殫力辭章尤以詩爲譚藝者所推服近世佔畢之儒矜言家學若元和惠氏寶應劉氏高郵王氏之經學其尤著者也獨爲詩古文則桐城姚氏一家而已意者考訂之學耳濡目染父可以傳之子兄可以傳之弟若文章之事本於天性之所固有因世運而爲升降非人人能勉強者也孟子有言誦詩讀書在於知人論世劭恣本此意以讀姚氏四世之詩竊謂 皇朝二百餘年豐亨豫大極於乾隆嘉慶惜抱先生優游盛世詠歌太平蓋正風正

雅之遺則道光中葉外患萌芽朝廷旰食石甫先生負經世大略百
蘊不得一施故撫時感事多慷慨之辭洪楊構亂烈於咸豐同治改
元號爲中興然視乾嘉之盛固十不逮一幕庭先生崎嶇患難之餘
浮沈牧令之官故其詩多蕉萃憂傷之作凌夷至於光緒三十年來
禍亂相尋紀綱盡墮而吾叔節猶從進士舉累上春官不第迨陵谷
遷移黍離麥秀之感一於詩寓之自石甫先生以至於叔節皆變風
變雅之詩也嗚呼文章視氣運爲升降不其信歟昔鄭康成氏撰毛
詩譜以爲得詩之大綱劭恣不自揆欲取 皇朝一代之詩擇其
關於興衰治亂者仿鄭君義例纂爲一書而於姚氏四世之詩尤謂
可以觀詩之正變者也己未春叔節既刊其詩命劭恣爲之序叔節
詩出入唐宋自爲一家不俟予之贅言獨於桐城姚氏之家學夙所

慕仰故本知人論世之意以質於叔節或不至爲說詩者所鄙棄歟
膠州柯劭忞

光緒初先考自安福引疾歸卜居邑西挂車山地多林壑之勝時時
爲詩自娛予兄弟讀書之餘亦間進所作先考獨奇叔弟以爲異日
必紹家學無疑也其後先兄早亡吳摯甫先生嘗稱其詩得冲澹之
味而所存殊寡予奔走於衣食數十年以好經史之學於詩不多作
偶爲之不逮弟遠甚大抵詩之爲道必性情真乃能有物又必資以
學力乃能有章二者既得之矣然苟才氣不足以副之終不能以自
達甚矣詩之難爲而爲之多且工蓋尤難也吾弟大懷浩落篤好羣
書固有以立其本矣而吳先生顧稱其才氣俊逸足使辭皆騰蹕紙
上雖百鈞萬斛而運之甚輕故能出入於李杜蘇黃諸家中而自成

體貌庶幾韓退之所謂人皆刼刼我獨有餘者哉吾家夙多詩人而世所盛稱者莫如惜抱府君昔徐椒岑先生綜論吾邑二百餘年詩家謂惜抱之後精詩學者爲方植之植之之後必推先考予謂繼先考而起者莫如吾弟夫文章天下之公物其品之高下非親愛者可得而私要其光氣所及卒亦不可得而揜也是稿嘉興沈子培方伯嘗校印於皖吾弟以其中多少作芟難過半復益以近歲之詩釐爲八卷付印將就正海內君子予爲序其首云己未冬十有一月兄永樸

卷一光緒庚辰至辛卯詩五十八首

卷二千辰至丙申詩八十九首

卷三丁酉至癸卯詩七十三首


卷四甲辰至乙巳詩四十六首

卷五丙午至丁未詩四十九首

卷六戊申至辛亥詩七十一首

卷七壬子至甲寅詩六十九首

卷八乙卯至己未詩七十首



慎宜軒詩卷一



桐城姚永概

春榮軒

庚辰至
丙戌

短臘將完春意動掃空山翠撲前軒雲移岫出雨初過鳥踏枝垂風
亂翻枯木架藤依砌立小鑑淪茗對花蹲老人扶杖倚門坐看綻寒
梅雙瓦盆

鄧繩侯

執孫索詩口占絕句

寫盡人間千萬景卻從何處賦新詩不如杖策穿雲去與爾同觀山
水奇

小雨

喧豗新漲沒前汀細柳垂枝覆野亭小雨如絲雲不散遠山濃墨近

山青

紅樹

野色當秋迴疎煙帶雨籠山中霜信早一樹已先紅

倚樓

坐憐春色遍人間更上高樓破旅顏落日忽明天外樹暝煙漸合隔
江山不辭爛漫追松羨那復嬉敖戀市闌北望二龍無百里萬芙蓉
裏閉柴關

雪中寄澂士伯父

聲

去年一冬少雨雪風物清和似春節屋頭鳥語欲親人窗外山光真
可悅天上人間春又來豈知一變爲寒冽黯黯長空白雪飛垂垂四
野彤雲結當門林木久模糊繞舍溪山條皓潔山村竟日行客稀茅

簷卓午炊煙絕丈人居枕龍眠青石徑無人扉晝閉青鞋藤杖懶出
遊破帽羊裘甘養拙遙知此際匡牀上雪深獨聽兒童說困眠不計
突無煙夢裏時聞竹微折黃花一醉直至今屈指已將三月別渴思
煮茗到山堂一甌同向春風啜

戲作乞茶詩寄澂士伯父

枝頭侵曉聞晴唳寒巖活活春泉動哦詩茅屋舌本乾坐想椒園慰
渴夢赤銅茗椀斑斑花好事風流誰最佳丈人七十猶煎茶澗底春
風來日夕龍眠新芽漸可摘遠緘香笏寄春碧齒頰苦澀待公釋
春色已深忽忽不樂偶檢涪翁觀化七絕刻意效之

桃杏開齊柳欲肥春光無那滿書幃酒香浮甕白蟻滑花氣撲簾黃
蝶飛

杏花遠近紅藏隴麥隴高低綠接山一川風物無人會輸與先生自
往還

屋頭百舌語不歇枝上黃鸝真可憐想見江南更妍暖故人長醉杏
花天

出山

山盤磴轉不知勞空羨巖菴結構牢歸路忽從天際落回頭始覺向
來高

霧氣連山向曉生半含春雨半含晴篋輿暫借巖頭歇倦倚茅亭聽
水聲

由九江至孤塘行廬山麓四十里村景佳絕

異書欲就輿中讀卻喜山光復掩之石簷半天流爽氣日高諸有忽

成奇喬松白鶴誰堪撫絕澗青虹却倒垂太白去今已千載屏風張
疊似當時

九江中秋

佳節登臨古所歡憑欄孤客且盤桓去年那識今年事山月不如江
月寬燈火幾家聞鼓吹樓臺何處不清寒遙知此際高堂上把酒應
憐行路難

十一月十五日發金家嶺寄內

今夜天邊月團圓照旅人淒涼臨野闊清切映霜新過鴈呼羣急寒
雞報曉頻不知閨裏夢曾否到風塵

十二月朔從王益吾學使之江陰二十一日辭歸省親丁亥正

月十二日復赴江陰感事抒懷得詩八章寄兄姊 丁亥

客子苦思家初客情尤重况我有高堂歸心愈難控千里非咫尺幸

借煙艘送郡城有故人邀我酒盈甕

抵安慶阻雪
倫叔家二日

歸途百廿里忍饑

踏堅凍

郡去縣百
二十里

抵家忽大笑一任雪如霧

入門上高堂喜極忽成疑平生外大母鞠育多恩慈念我日百復見
面翻無辭坐久撫我言爾今豈知之勿謂爾長大我視爾猶兒歡言
迎大姊談笑回春姿暖湯濯足臥猶夢在途時

嗟予與仲姊失母年尤早

概九歲姊
十一歲

每於昆季中相憐情更好南方

水土薄營葬事難了饑驅不得安相對日百譌一阡何日成搔首青

天小

在家日已少早作行裝備補紉與浣濯良爲室人累親故聞遠行壺
觴日相事流連故人家莊言雜談戲此腹常便便自笑太豪恣平時

日日親那知此不易小別不必悲男兒有遠志

大母八十二那忍別諸孫臨別不肯辭含涕聲獨吞親友重初別皆
來敍寒暄就中抱潤子顧我尤煩冤平生手足誼攜手出邑門吾輿

發已遠猶聞珍重言

大兄透出南門乃悵悵返

此別詎隔歲有約梅花繁

到家十五日愴恍如一夢歸裝未洗塵又見別筵送出門雪未消茫
茫白無空停輿入田家茅檐樂聲闐咄哉爾何福骨肉長年共朝耕
暮還家不解離別痛感此倏回首龍山清可控

龍眠山百里吾邑山之麓敝廬城東門日與山光觸綵戲重闌歡書

共諸兄讀顧此豈不樂饑寒忽相逐仲兄北海去伯兄跡且續大兄二月

擬赴天津今予又遄征僕僕何時息山氣沈暮寒此心如轉軸

行經天林莊旁有故人宅重是經年離叩門揮短策

是日訪仲勉仲葵於天林莊留

宿相見互傾倒欲停苦無隙留我雞黍飯白日忽復夕鄉井共難安

各有萬里適

兩君將游臺灣

歡言不忍散更就聯牀宿雞鳴催客醒前路看

已白

寄送外舅應黑龍江將軍

恭鏗之聘

先生五十鬢毛蒼萬里青春去故鄉入幕上賓聊自許長年旅食或非狂飛雲出塞沙場白孤月當空海氣黃出餞一尊無處所天涯極目斷人腸

遇仲勉

戊子

阮公何落魄吾道起し真非一病將鄰死經年見汝歸天涯知己少邑里故人稀愁對長空鴈冥冥何處飛

樟樹鎮阻風寄兩兄及范肯堂姊夫

己丑

寒波生空江雪後北風作蕩蕩旅舟搖昏昏白日落公等共嘉會逍
遙一何樂酒食恣流連文章互斟酌夜談忘更鼓晨眠遲鈴索焉知
遠遊子旅病肌膚削夜闌或夢見彷彿似如昨薨薨一宵事雞鳴又
阻格愁心何處散蒼茫付寥闊

上海

客遊倦風潮稅駕來海疆海疆古下邑忽復富且康浮雲切天起蜃
樓鬱相望厨館辦豐饌東西列名倡皓齒發清謳婉轉隨風颺千金
娛一夕爲樂誠未央長衢平若水車馬何煌煌琉璃隱飛電明月慙
其光清寒鑑毛髮照影生淒涼繁華冠當世氣象破古荒居者厭他
適行者忘故鄉酣嬉送白日歡笑故有常不知深憂者何事苦遑遑
僕本寒鄉士一覽三日強慷慨臨東海願逐鯤鵬翔

渡海

志士平生心無由寫豪雄暮附申江舶朝臨滄海中碧水際蒼天邈
然四無窮天光忽下映鏡面磨青銅白鳥何處來翻飛逐我篷旣無
棲定所孰辨來去蹤長嘯散幽懷琅琅響天風耳目寄清曠恍惚聞
笙鏞我欲搏扶搖下視九州空不然魯連子高蹈聊相從二者都不
得懷抱與誰終冥冥方結想忽過成山東

贈鄭東甫

杲

京華冠蓋著斯人十載相思夢寐親日下論交文舉少門前載酒子
雲貧西山雲起成朝雨北地花開過晚春便與先生期白首扁舟同
采五湖莼

大人與武陵陳蒲仙紹興諸硯齋肯堂康平篤生士宜及兩兄

試院聯吟二姊率甥女森猶子佐燧亦頗有詩因集爲三釜
齋唱酬小錄一卷永概六月自都門歸始發而讀之敬綴一

章

范子天下才壺腹貯琳瑯來爲姚氏甥冰玉得益彰若耶舊樵客武
陵老漁郎燈火古安成會合天南疆機深嗜欲淺吾宗有老康攢眉
覓新句結想存陶唐珊瑚玉樹姿阿英與阿璋正如雙飛鶴參差追
鳳凰伯也詩語清好句夢池塘仲也才溫溫美玉出崑岡更有雲霞
手欲織天孫裳提攜兩稚子亦解搜枯腸秋蚓思弄笛春鶯學調簧
老人公事暇試院春風長戲出斲輪技引之使其昌雄窺李杜窟秀
擷屈宋芳雷電下光怪沙水忽微茫頗似蘇長公白戰聚星堂豈讓
謝太傅兒女解篇章是時概獨遠單車之朔方邑人無狗監何因獻

長楊天閣虎豹守茵溷隨風颺一擊果不中逝將返故鄉去時雪山
白歸日炎山蒼楚南多暑雨窗戶生新涼柳枝覆書榻芭蕉壓短牀
雒誦聯吟詩長瓢挹天漿如何詩中人南北又遑遑雲山因乖隔後
會安可量誰令萬里遊失此百日光再拜綴此辭聊以解慚惶

大人復宰安福之三年民家生竹一科三莖以牒來報翌日劉
生又以並蒂蓮獻命概作詩誌之

剛傳美竹連科出又見新荷並蒂開綠弄晚風搖碎玉紅迎曉日鬪
雙腮昔聞先德南安守郡有嘉禾報瑞來會與兩朝成故事潁川鸞
鳳可追陪

老柳行

兒時種柳當檻前舞獅蠟鳳爭喧闐十年一去不相見愁對黃鸝與

紫燕昨來復買章江棹陳跡茫茫已堪弔官閣春深舉酒杯落花舞
絮心空悼當時手種一尺強而今離立參天長朝煙凝翠暮烟紫春
風吹綠秋風黃柳枝深處棲鳥侶朝飛暮飛還相語借問烏飛爾何
語老烏不食子報乳嗟哉爾烏爾有母哀哀孤兒涕如雨

馮小白

世定

爲予畫西山精舍圖成題後三首

西山在何許潛皖萬山中繞屋花侵路當門瀑挂空烹茶拾松果選
饌下魚筒欲識春歸處茶蘼一院紅

鳥語回清夢山居事事幽偶從兄問字閒看婦梳頭疑義高堂析
詩阿姊酬故人乘興訪更破索居愁

補漏茅爲屋編籬竹作門圖書仍世久經史託身尊雨散雲留脚潭
空石見根七年雲壑意漂蕩與誰論

二月 庚寅

二月垂楊漸可攀，御溝漸動已潺潺。
鳳梭玉戶春空到，龍馭瑤池宴未還。
仗影穿紅歸北苑，泉聲引碧出西山。
李萼若傍宮牆聽法曲，應知異等間。

出都過通州訪外舅留三日乃去

飲馬燕郊別帝京，停車潞水入春城。
衰年杜老猶賓客，早歲徐公負盛名。
三月天涯華髮換，百年心事縹囊輕。
青衫潦倒從人歎，白酒縱橫慰旅情。

哭外祖母厝室

謝公亦有言中歲，傷親故昔聞。
今身遭古人言，匪誤年年西山中。
歲曹岡路循輿夜，叩門烘烘銀燭曙。
中間曾幾何境，往情難住人生。

信如夢此夢况多苦大覺在須臾百年因已悟獨有平生親欲挽春
暉駐性命不由人哀哀向誰訴

今年北上時準擬經故鄉誰使十日雨滯我百里裝未歸亦偶爾遺
恨千尺長旅懷成噩夢左車牙脫牀心知象分離骨肉故有傷龍山
隔車轍海水輕帆檣一面永無因已矣魂茫茫

去年北方歸病起幸未厚今年北方歸魂去骨已朽入堂素帷徹奠
野清風吼痛哭碧山根黃泉得聞否九齡失恃兒年年困奔走鞠育
報已空今惟一姨有姨也病且衰相守那能久昂藏二十五骨肉恩
常負成相愧袁公奉生慚劉母悠悠百年心念此中腸剖日落背山
城荒厝誰伴守

哭澂士伯父

吾宗已寂寞又况失斯人話舊今誰共傷心老更貧蟲侵茶竈石鼠
篆竹牀塵敢惜憑棺慟平生我最親
異時精舍好就我碧峯隅眼淨書能寫身強杖懶扶山中留點允林
下媿瞻孚何限人琴感寒泉薦束芻

次大兄韵留別

日月飄蕭易涼燠吾獨有愁能不掃投身世網望江湖一葉虛舟風
水浩嗟哉大母八旬餘精氣雖強固已老腰痛行需孫子扶齒豁焉
知鵝鴨好高堂六十漸衰來弱弟萋萋未離抱諸兒頭角雖長成正
藉昏燈與論討去年仲氏返巢棲予也今歸奚不惱婦病經營那可
遲柴門布置何堪少昨宵喜得故鄉書已兆牛眠宅蘋藻艱艱門戶
要人支去住閒愁未許道孤鶴蒼茫別故儔一聲清唳落天陬破車

殺馬終難留且對江山盡此甌鄱陽萬頃浪花適明年可來兄勿憂
舟行感懷用肯堂初到安福之韻示韞輝

一夕灘聲客思饒悁悁情慆筆難描交游南北飄零盡骨肉東西悵
望遙雲擁斷厓迷遠樹風和凍雨泊荒橋重簾綠幕高堂上愁聽寒
更那復聊

千絲萬縷比蠶多祇恐情深被佛訶細語卿同消永夜長途天遣放
高歌往來道路經三載今古賢愚共一科爲問寒沙新雁侶明年春
水定如何

將至吳城投王丈柳橋

維新

丈人憔悴鄱陽上直道長令志士疑頭白自昌當日氣眼青能記故
人兒百年膏澤留人口一斛齷齪負盛時最是宴歸紅燭晚半行分

照至今思

吳城阻風

湖水落半槽歸櫂趁急溜雲中五老人吐氣彌宇宙萬舟阻不前添
纜相看守掠野龍虎遭發空笙竽奏羲和迷朝御星斗失夜宿吾聞
灌嬰井浪動知風候肩輿欲往探畏與巖寒鬪寄言匡俗君見戲毋
乃驟平生愆尤多無德神其宥思取卦書占苦無靈符呪詩篇日日
吟酒椀時時颯南風固難望波平儻許邁

翌日舟行泊渚溪

小雨殺風棧開程放朝溜長年理篙漿寒霧塞四宙匡君羞見我故
遣元雲守予有短綠章欲向仙人奏排空叫帝闈奇語驚辰宿西隴
青蓮才東籬黃菊候性剛嗟世忤道危與命鬪徒使千載士趨趨失

步驟我生逢中興天下欣在宥廷半鸞鳳棲戶無雞豕呪魚筍飽旅
餐橘柚供清醜高足如可追屯遭庶免遣

過南康

雲開一老出濕翠如潑溜斑駁隱寒暘奇情壓宇宙我舟出南康永
懷古賢守曠絕一千年清調無人奏峨峨白鹿洞名若經天宿前年
過講堂鞠躬致啓候羣兒持半簇妄與大師鬪坦道停輶輪荆棘困
馳驟惜哉爾何愚墮落神豈宥曉曉不肯已何異小巫呪平生有微
尙思飽椒蘭歟江山政如此佳客未易遣

屏風山下

望歸旅思集歲晚北風高一峯障天末背水繫百艘蛟龍氣逼人白
晝吹腥臊匡君挾五老欲棄坤輿逃正恐二神山向我索六鼇誰云

一氣力能使萬竅號賈人逐倍利竹屋編江臯陰森石壁孔向來宅
鰓魴水落民聚來出入如猿猱網師登白鯉持我易錢刀對箸不能
食枉使釜鬲膏妻愁奴僕歎我安弗鬱陶

孤塘

微雪趣朝晴西風張半席五老列寒空一夕鬚眉白面面入舡窗顧
我不速客關門雙旗紅津吏恣呶日高慵未起連纜不聽釋大孤
浮屠尖蒼鷹所窟宅安得劉郎弓石八印天射

湖口

石角向水撲連峯撼大湖皇皇丁將軍仗鉞守要隅國家立水師本
以行天誅功成無所置用防奸宄徒事變匪人意乃自同荏苒王法
棄不問商旅嗟何辜悵望雙石鐘瞪目久驚吁舟人報風健期斫吳

江鱸

以楔草一本贈金子善家慶繫以一詩

貴人買花不惜錢
楔草雙鉢費十千
遂教空谷美人種
胡繩網載來
市廛朱欄玉砌豈不好
俗氣毋乃花憎嫌
可憐全椒金夫子
閉門往往突無煙
數椽老屋友生借
小庭寂寞花芳妍
新詩投我乞名卉
負君諾責經三年
鄱陽水落放歸船
風平櫓趁皖山前
致贈一本聊寄意
莖葉雖瘦神猶全
莫言此物殊
萋萋政取伴
子琴無絃

楓冲辛卯

離恨經年苦不禁
篋輿衝曉出寒林
垂簾弗忍看山色
恐引秋光上客心

四時詞用東坡韻

慎宜軒詩集卷一

十一


曉寒翦翦侵簾幙芳院生憎吐紅萼東風似識主人愁正遣花開復
吹落沈檀香桁冑春衣那有心情護玉肌年年辜負時光好露葉風
枝却恨誰

雨過蘄簾生微冷夢見通衢南北永喧喧車馬汗如漿日高風定黃
塵靜薄羅衣袖自輕勻長眉不解鏡中頰芭蕉葉大楊枝細愁煞當
時手種人

西風策策鳴枯竹吹碎高紅並遠綠牽牛引蔓蜀葵開深院沈沈照
空屋斜光未入掩重扃草色如雲自上庭雙鳩不管人離別猶作尋
常喚雨聲

楚南十月霜初落尙有芙蓉出籬角采之盈把欲遺誰嗟爾雖妍顏
色薄歲歲花開鬧晚霞可憐人信不如花銀缸夜照金錢卜不覺高

樓叫早雅



慎宜軒詩卷二

桐城姚永概

出都至天津遇仲兄留三日送之旅順

壬辰

御溝柳色不留人送我征車出帝城
豈料津沽三日酒得傾坡潁隔
年情路邊紅頰從人說故國蒼顏入夢驚
興盡河梁又分手成連好
去聽濤聲

到保定二十日作詩二十四韻奉吳先生

汝綸

龍眠去浮山百里青可覩三十六洞天
一一藏深巘年年發憤游欲
往牽每鍵山中大有入疇昔侍繾綣小時未知羞袖文不盈卷亦思
持鼠腹竊飲河流遠公出齒牙餘譽之情婉婉望舒嗟幾圓耀靈忽
易晚豈知了了者轡騁足屢踈六月出燕京黃塵沒車轍謁公蓮池

間風柳鳴蝸蝨十載望見忱悅如客得返公清猶故履我荒非昔婉
元雲出太行千里垂黝黝急雨挾清風頓失連朝懣館我樹石間笑
談去畦闢矜莊雜恢諧疊疊復蜿蜿乃知培成心意氣最雄穩吾鄉
百遜昔人才運未蹇逝將奉公歸築堂臨廣坂龍眠照戶牖浮渡作
園苑百年將墜業肆力追逋遞殷勤秀苗實芟彼草蓐蓐願公勿棄
捐吾言乃至悃

調李剛己

李生不橫行局促守燕郊徒然鬱豪氣上與雲雨捎烏睹天下麗浪
結江南交何不從吾去流觀一解嘲狼山跨海矗范子昔所巢跼跼
新綠軒猶留一把茆泝江到京口金焦儼以庠朱欄凌飛鳥笑語壓
潛蛟蒼翠堆百疊羣舒山周包龍眠接浮渡步步逢林坳石泉清可

飲澗蔬妙能肴野花紅破蕊高竹青抽梢復多能言鳥弄舌欺管匏
雄奇擬龍虎纖巧類蠨蛸往往絕谷中五石大瓠拋嗚然不世用笑
聽羣言呶乃知山水窟人富地豈饒裹糧儻見許知我非嚶嚶

夏日遣懷

浪作幽并客悲歌與孰羣一池滄海水半堵大行雲鄉思馮書解羈
愁賴酒分更含千古意欲弔望諸君

書笈從衣僕遙憐絕島人海光侵葛帔潮響入蘆帘經術與時背文

章來世曠由來廉吏後合採楚山薪

仲兄時
客旅順

南樓高且迥便欲望西山古樹寒蟬發層城落照殷孤懷起昭曠奇
興想登攀近喜多文士相從日往還

佐食淘槐葉清游坐藕花午行看圈鹿曉夢警飛雅碧玉初栽果紅

穉乍擘瓜江南多勝事莫向此中誇

疊韻酬楊佑甫

寅揆

昔忝生同里通門識紀羣今來居比舍淺學愧淵雲元語應同受黃金孰肯分無煩倚長鋏已見孟嘗君

先生古著蔡名論厭天人室儉餘穿榻堂高不掛帘清歌知爾俊狂語豈吾嗔驥子真奇特他時與荷薪

永叔歌菱石東坡賦木山片峰依竹碧千竅篆苔殷倦易連裾坐登無著屐攀羈棲真得此鄉夢那須還

弱柳垂低葉高荷作大花出窠跳聚蠹占樹鬧爭雅塵土宜焚芟風光近設瓜天孫如可乞同向柳州誇

疊韻酬李玉度

落落李公子，栖栖與我羣。金貂多舊雨，蒼狗變朝雲。屋已東西並，牀

寧上下分。庭中楊柳老，清德想劉君。

尊人宦此亦居園中
卽玉度今憩之室

娟娟好池館，靜妙便南人。水滿宜浮艇，風涼欲下帘。叫呼從我樂，斜
眄任旁嗔。絕勝長安客，空教桂作薪。

君家阿弟秀，南望隔江山。晏坐室生白，汚人塵自殷。龍文應可舉，虎
步幾時攀。亦有徽欣樂，浮游未可還。

來日槐初葉，于今滿地花。經過馴鹿柵，黑白熟枝雅。旅食初嘗豆，鄉
心又薦瓜。但慚持布鼓，未敢過君誇。

玉度屢疊韻，索和兼憶及。通伯不得已，再次酬。

昔者山林客，甘心鹿豕羣。高風乘渤海，盛暑攬燕雲。西上書徒獻，東
方肉未分。江南芳可採，何必九州君。

秦淮千古水無地著愁人看月同浮棹聽歌妙隔帘已成蕉鹿幻竟使茅狙曠去去爾何恨安知非積薪

王令愛新客招攜過惠山名泉春碗碧官燭夜窗殷耆舊事皆往風流若可攀似聞習鑿齒已爲著書還

爾自身如瓠吾慚筆未花共成流汗驥莫逐帶陽雅世論求僵李戎機易剖瓜鴟夷能散髮獨向五湖誇

荷花用昌黎杏花韻

大荷如霞燒遠空小荷出水嫣然紅扶持萬葉玲瓏碧明妝寶蓋搖清風平生水國見聞慣綠蘋紫蓼村村同燕南趙北陂塘少何人經始爲汝功沈沈下視影深黑疑有怪物藏其中我欲投竿作巨釣鱗甲躍出千花叢呂公任子不世出極目江水涵青楓嗟哉手無五十

惘深曠太息心無窮夕陽已浴咸池底朗月忽起扶桑東江南秋漲
遠到海剌船早去伴鳧翁

送客

雙旗夜駕鵲橋旁羈客登臨忽憶鄉天末逕凌東海碧眼中已見楚
山蒼江南晚稻剛抽穎水國新鴻漸作行君去若逢兄弟者歲寒吾
得共深觴

曹岡

篋輿軋嘔曹岡路寒風日暮吹枯樹當時紅白二株桃根翻葉蠹今
無處桃下青君白髮人蓬科永臥龍眠墓平生親義那可忘三匝團
焦不忍去

出門

癸己

平時萬里別不及此番難藥裏拋妻病松秧戀墓寒家貧徒有壁親
老那堪官安得一囊粟從教盡室安

四月

此生去住未容論兩載春光滯薊門客裏朋來每驚座酒邊愁解似
招魂榆遮戶牖風增力萍合池塘雨少痕團扇禪衣成底用天涯四
月木棉溫

江南會館後院有竹一叢甚茂北方此物絕少喜詠四十字
竹本江南種誰移植近畿不愁冰雪重只怕日風欺土燥宜輸灌梢
長與護持月明深院靜或有鳳棲枝

憶姊

吾家大姊四十二貧家門戶多生愁悅縞長女行及事囊橐夫婿思

遠游恨無宅相慰袁祖祝願功名到馬周中宵苦憶起對月孤光流
照天南頭

贈錫九疇九兩族祖

爲霖
廷範

長者憐疏放華堂召舉卮王瓜寒有刺豌豆嫩留皮客味春從減鄉
心酒不知今宵歡動意一爲少年時

青蒼北郭外好是古郎山買地終成隱栽松莫漫還文章片石在邱
壟萬年閒但使子孫長何須鄉里間

肯堂寄示詩一卷中多嘲應舉求官者流兼及予出門詩以爲
笑謔乃次其口字韻以問之

我誦子詩略上口有酒真堪下一斗子詩卅首在我前子心與我相
回還我心區區子不見託之宏農會稽間冠蓋紛擎九天上元珪夜

投人不賞如子縮手真聰明我今況並無連城朱門陞戟渠有命豈
與木樨論朝榮我聞藐姑仙人冰雪似肌膚綽約若處子縱令插足
到人間不逐市兒爭愠喜潭潭相府夏生寒有書可讀棋可彈西瓜
斗大南魚美賓朋絡繹相追攀子今享此亦云泰夢中曾到黃泥山

藤花久謝暑雨中忽開數枝吳先生邀賦

憶從三月來藤花已如標雖有一兩枝離披不能好正如筵欲散八
珍任顛倒賓懷就別心主有無窮抱畿南困霖雨濃雲壓城小螭龍
懶不歸出門泥沒轆誰開青羅幙忽放紫綾襖衆芳各退位晚出更
窈窕東牀王家郎鶴碧冠羣僚南宮李生者楚楚北方寶秋風長安
來端爲兩人兆仲子久藏珠曾事歐陽老或分四壁餘布席爲灑掃
公儻是我言長歌聊作禱

薄薄酒一章和肯堂

薄薄酒不如茶故山封寄黃金芽色碧香清沁兩頰夢回時聽松風
誹醜醜婦不如花嫣紅妊紫整復斜秋庭風露少人跡相對婀娜如
嬌娃吾家持門有好婦亦有新荔可釀酒江南萬里未能到不與先
生供鬥口坐飲茶起看花年來漸解此中趣莫持子趣向吾誇

聞兩弟將來天津

卯君頭角已修修應比寅君放一頭夢裏於菟垂兩耳望中撲朔豁
雙眸別離皖北三春雨談笑畿南八月秋藤葉千枝槐百本阿兄端
爲此勾留

寄韞輝

昔我西山居自謂百事足長風忽吹散江海馳輪輻五年古安成官

舍館梁肉仰看垂白親簿責厭敲朴京華三上書未肯解汝璞哀哉
大母恩一旦歸窀穸饑驅事奔走年少不容戚更使雪盈顛來依相
公食子年日以壯親境日以蹙因茲中宵寐感歎忽起立苟得老親
權違計一身俗溧陽困東野葉尉紆山谷儻獲百里宰絕勝抱關辱
親庭既宴喜弟兄罷行役吟成四十字歷歷在篇牘不敢示他人寄
我手足矚或疑變初心漸與紛華逐嗟哉此何語五衷血可瀝對面
成九疑孤悵難再述生平冥鴻心豈爲一官束雖然作此想世遇豈
可必枉道吾不能吾久矢曠日故山有茅屋故園有松竹我雖不把
犂灌畦可課僕子雖不上機養蠶可代織充腸不滿升裹體不盈匹
衣食須幾何唯爾知吾臆浩歌攄激烈遠寄深閨讀

殘暑未肯退秋陽驕羣蠅翮飛窗戶間未曉已薨薨俯食必緣背仰
讀遂沾膺孤行猶闕隙羣來意軒騰屢揮暫避去停塵卽相乘汝時
亦已過涼風行當興汝命無百日何苦還自矜

次韻和肯堂自壽六首

聲名潮正起歲月日方中文富身知健詩成道未窮調高遺外物靜
勝息交訖獨有多情處難教綺語空

挂車一茅屋八載去留心石瘦動潭影林深發鳥音閣晴春碾茗山
雨夜停針繡戶今仍在仙源或再尋

聞道畿南雨連旬不肯停萬夫疲畚鍤百室歎飄零細誦蓬瀛句直
成太乙星魚蝦落燕席鷗鷺泛前庭

飛騰心欲倦傲睨衆人間海內三君在高堂二老閒因君奇獨擅使

我淚橫潛萬歲青楓嶺陰森墓戶關

道路三千里何由隔此心舟車徒自遠江海忽無深
杏杏龍蟠野翮翻鶴在林幾時能會合瓜李共浮沈

秋淺漫思睡天高那可希紗窗新月透羅被夜涼宜棲鶻爭枝
杪啼螿滿水湄山公今已醉拍手笑羣兒

肯堂用宮字韻寄通伯邀同賦

離別長年侶漸空看花那復故人同情多無耐杯中綠愁極全消頰
上紅秋色蒼蒼連鵲岸短衾夜夜夢牛宮魚箋馬槌從公好逆水衝
風有二蟲

讀后山集秋懷十首依韻和之

今年四十日倒海瀉飛雨竈頭游蛙黽屋上鳴機杼司農黃金錢歲

發不可數哀哉羽淵君獨觸虞廷怒

槐柳城郭暗蒲葦江湖荒蝮枯疎韻失燕老歸心忙獨有隨陽鳥知
時投江鄉寄聲山中子蘿薜吾未忘

生女當學織生男當學耕耕織身事足不希身外榮搖毫矮屋底簾
外春風深羣公動色喜已失平生心

寒月上屋山榆柏陰滿院莎雞不促織催我把書卷惡之去恨遲我
喜乞如願古人有至言一洗恩與怨

東方隱金馬子雲困天祿豈如東籬翁歲晚掇佳菊置身六合外醒
眼看蠻觸強者雄牙鬚弱者甘爲肉

我從吳公游稍知識圓方乞我飛霞珮衣我芙蓉裳公如籬外菊晚
節高花黃賤子菊根草永依到冰霜

一鵲聲送喜尺書貽遠道告我近栽桑科目心已槁葉大蠶可飽葉
落炊可掃得失江海間心迹胡自倒

吾友馬季長問學思過半矻矻詩書心百折終不換俗士罵應爾譏
嘲出同伴濯濯芙蓉花可親不可玩

曉鼓烏四出落日烏先歸豈無多樹邨啞啞戀此爲君看挾彈子孰
敢窺此池我自避機辟君問果爲誰

養文十年事速化非真仙端須乾舌本吐出千青蓮文字浩萬萬著
眼力必穿是身蠹魚蟲早結鐵帙緣

肯堂戲擬陸魯望漁具詩十五首而吾姊擬襲美添漁具詩以
足之肯堂寫卷子索和大兄先成十五首清妙獨絕與肯堂
之悲峻相敵不能復有加也乃效吾姊作五章聊報督和之

意

漁事有且暮結庵豈辭遠彌天風雨來獨守一龕穩有魚卽投竿無魚且上榿素心兩三人就我同羹飯

漁庵

秋水一片石日日把絲綸甯知坡陁上古有龍虎人大釣在天下小釣安一身風期已千祀江海渺無垠

釣磯

披裘吟中澤不能却溪雨織草以爲衣稱體輕易舉閒簷農父借或與牧兒語晴明卽挂壁珍重有時取

蓑衣

白日照萬物一笠如雲橫雨來打頭上千杖交鏗鉤團團三尺下鬚鬢自崢嶸持輪淡忘返晚作溪中行

笠

游魚須俯窺拳躬伺踪跡笠影不到處編篷承其隙任從風日烈不作龜文壻智者創物心竟爲一身役

背篷

道出青縣錫九叔祖留宿卽贈 甲午

運河斜抱古城東清署投驂午日紅
客子喜聞新政美主人兼有笑
談雄纖纖麥壠思陰雨短短桑條困野風
情話今宵殊不惡可憐鴻燕俱怱怱

阻雨青縣和錫翁喜雨之作

谷底愁龍不自由起驅鱗甲出潛湫
使君已慰豐年望客子遑興官道憂
際海風光連北闕如雲黍稌卜西疇
巫尪自暴胡爲者眞使巫

咸下九州

青縣一老人自暴烈日中誦高王經三日而雨

雨霽登閣歸而主人小宴

五月風高不墮地登城始覺袂翩翩
輕帆帶日猶遮樹積水如湖可種蓮
萬里親知稀更好一尊心事醒無傳
官衙且可明高興鴨美豚

鮮爛滿筵

武邑觀津書院絕句

雨洗娟娟媚晚叢
午葵占砌各西東
憐渠已過春風日
縱有香姿只

自紅

瓜條菜把聒鄰牆
父馬童牛哄早場
恰喜今朝逢五集
亟呼奴子數

錢忙

伯子詩如江水清
去年漁具最知名
元明何日偕山谷
桐梓樅陽一

艇橫

無盡長明燭
九幽東坡詩卷到
今留炎天冰雪澆
腸冷最是黃州與

惠州

長年辛苦發遺經
三十塵衫未脫青
朱雀金花我無訣
相從祇恐髮

星星

懷仲兄也用
東坡詩意

和肯堂濯髮飲瓜汁之作

頑雲潑空不可啟雷車
隱藏雲底天公似厭人世污
欲倒天河爲人洗赤脚
粗童打我門新詩一紙拾遺體
不將新沐思彈冠但說餐瓜如啖齋
吾儕入化偶爲人只有虛空是根柢
已嫌口腹累吾眞况乃貪痴戀甘醴
秋毫非小倍非大莊叟微言中肯綮
九州號物人處一有似太倉數稊米
昨宵酷熱今宵涼惡比仇讐好兄弟
生者相逢喜在顏死後應知各含泚
出門不辨骨誰收猶詫門前賜幢檠
吾欲從天問是非又值鴻濛方拊髀
君今高興日爲詩迫我連番傳急遞
狂言遇君一吐之聊破支眶無限涕

感事次熊錦孫姪婿

道

鑫

來自大名見和之作卽送之應順天

鄉試

孤注奇冤堪墮涕萬里雷州走迢遞豈知巨敵要人摧斤斧由來用
寬髀時平大郡何所爲幕府哦詩輝戟檠多君興到百紙盈渾渾衆
流弄清泚結交不肯胡越分情投四海皆兄弟津沽一舸經月留更
欲長安往索米文章應舉小技耳未必微言經肯綮連歲察舉天下
豪置之明堂設甘醴詎無一士萬人中草脚離離見深柢但愁甘帶
與嗜鼠正味不知茶當齋近聞東征健兒出似爲全軀保支體北門
坐鎮老萊公日望凱歌兵馬洗羣童妄意恣彈射何異墟壘拘井底
行行努力對明光阿唯之餘口無啓

梅花嶺謁史公墓

江左區區未易存傷心半壁不堪論公才那復輸王導遇主何曾得

晉元孤阜漫憐神有托四圍聊借樹爲藩何人好事栽梅補攀折長
條欲斷魂

登北固山最高樓

南徐昔作中原鎮北固今爲攬古塲世局自需人料理江山空使客
悲涼迎年臘雪寒初凍近海橫風晚更狂孰使吾身遽遲暮寥天一
鴈入蒼茫

狼山 乙未

長江日夜來遙與海相會茲山正突兀勢壓九州外諸僧巧招募樓
閣起雄最鐘韻迎春潮經聲落蒼靄走昔泛滄溟頗知天地大歸來
對江水直若衣上帶眠借松根牀饑餐石田糲湖陰挾微雨自遠疑
飛盃歸興忽超然身謀亦云泰

通州水心亭

野水隔城市人來須小航亭臺初不見但有千垂楊道人拂巾出高
冠危且方不語自微笑聽客高踞牀玉蘭當塔植醃醢新開房淹留
午到夕茶舛繼壺觴新月始有稜光輝猶未長迴臚蕩小漿撥刺驚
鳧翔却顧所來逕暝色含煙黃

月憶仲兄鳳陽

風潮長夜涼竹影自蕭散悠悠離別中七見清光滿清光故亭亭別
意行款款去年江頭送買酒雙盈椀却顧稚子嬉悽腸冰不暖吾儕
坐呻吟大類鄭人緩手足不自揀別長會每短勿言斗筲者硜硜何
足算黃金高似斗更取北門管

贈陳靜潭

澹然

有田不能耕有屋不能住七尺不貲軀竟爲漂泊具昨日金陵潮今
朝瓜口路眼中三百里未必當虎步天門蕩蕩開白日昭宿霧帝旁
玉女多妒此修眉嬀山廬鮮芳草江徑饒蘭杜著述百千言蟠胸猶
鬱怒呼叫千秋亭癡人愕相顧信陵骨已朽肝膽向誰露但取意氣
傾錢刀何足慕

江潛之編修

雲龍

自都門來示其新詩三章同游梅花嶺史公

祠次韻奉酬並柬靜潭

臨海忽不渡徘徊惜此身羨君天上客瀟灑作閒人虎豹今猶在蛟
龍未敢親匣中書與劍尙有御街塵

世亂誰愚哲都如泛海船孤城垂破際竟死汝真賢懷古一朝事憑
欄半日緣新詩唐氣韻莫漫與人傳

昨夜中庭月亭亭窗外過風情疑戀樹雲意忽成波二子別離久安知權會多便從今日數到老更如何

贊化宮潛之讀書於此

精廬遠市氣能清侵曉追涼入舊城出屋高花含遠態迎風老樹總秋聲暑消不用驟姚逐慮遠寧煩口舌爭機事盡忘餘習在猶將高論壓時名

不寐

雨過雲開斗自橫高梧猶作夜窗聲背牀燈燄愁無定逼枕蟲音聽更明新法若遭清議格國仇誰遣壯心平金繪竹槿俱難了又報西方動甲兵

偕通伯宿仲勉宅話別

丙申

草色初回碧未深故人家在水西林人因就別成新聚天與微閒得
小陰一宿不嫌供草具百年爭忍負初心却憐少日真痴絕竟月婆
婆漫不琛

陪外舅登金山妙高臺

長者華顛興不羣要余臺上對斜曛蜀江春水當簷下東海潮聲入
座聞地險登臨多客感名高彈壓要雄文欲將劇嶂鎚樓意徑與開
元二子分

清明陪外舅游中冷泉舊守王公築方池輔以二亭憇客

清明日靜天無風步履喜與尊者從棕鞵桐帽自輕容拄杖不市蜀
賈筇芳洲平綠草茸茸問名莫辨蘆菡萏小桃婀娜張輕紅何來亭
閣洲當中板橋度客彎作弓僧雛出迎能鞠躬道我鄉井故守同守

昔作吏如黃龔督築陂堰煩水工縱有小旱收仍豐不復拜禱龍宮
龍祗今守亡已四載感歎無間婦孺翁聲首異口出一宮此泉脩飭
乃餘事想見爾時蕭灑胸我聞僧語已太息酌泉飲之更沾臆當時
謬蒙一日識不亞廬陵得轍軾連娑歲月頭空黑寥落江山永相憶
公如此水千丈清我如舊井渌不食

次日游竹林寺遇雨送外舅歸里

良覲既匪易三載一合簪曠然春江上言作招提尋側徑背江轉數
峯碧沉沉屢問始見寺一登已澄心簷端走山鼠竹裏鳴嘉禽上堂
見羅列酒椀夜光琛旁有西域人顧語多差參僧云適於此殊族竭
羣臨乃知清絕地胡越同一欽東風挾海氣吹雲漸作霏出門已有
勢中道遂侵淋入店翻成笑解衣各倚衾明朝丈人歸諸女繞衣襟

弗愁言語竭持此敵更深

徐芷帆編修

德元

以詩見懷次韵寄之

我已心期事事違兩年賓館鎮相依交如蟻蠓因風聚別類鳧鷖背
隊飛江上流傳雲錦句山中辜負芰荷衣早知行止原非一祇共娟
嬋千里輝

次韻寄和肯堂游浪山之作

日月遞積新故年至人有宰任汝遷升坑墜谷巧作緣禍福自己安
在天七十二沾春風顛長橋丹碧跨平川輿轎擾擾蓋田田大馬矯
怒如龍然君潛幕府聊自全我擁諸生享餐錢肥癯雖異俱游仙此
樂政未知誰先回頭陳迹雲煙旋飲酒莫辨聖與賢相公周游環海
壖名王傑相爭相延君傍名山伴枯禪我媿旅食愁蹇連眼穿不見

明珠懸空對新語味娟娟

連日水味甚劣戲咏遣之

揚州井水斥鹵兼汲江稍可供烹煎官衙日費役百肩黠奴智出符
竹先往往鹹苦螫人咽吾家羣舒山四連石泉漫流聲涓涓松枝燒
火青生煙縷縷吹出山家簷人生細故隨運遷但取少許莫忿惜君
不見大甕滿盛惠山泉隔江輸送煩吳船一滴不到酸儒前肥腸日
用澆腥羶

遣悶

風雨初來冷布帷拙鳩啼處濕雲垂華桐葉滿飄香乳新竹梢長過
舊枝槁坐穿槃殊易透

山谷詩木穿石槃未
渠透言校試卷也

叩門乞食計良癡一家

骨肉都羈旅愁絕揚州梅子時

大人候選京師
二兄修書金陵

輓王少蓉茂才 仁堦

賓館偕依一歲餘，隔牆時聽誦聲。徐病抄秘籍，從人借貧賣奇書。出
舊儲秋葉深紅當故檻，晚雲淡日照前除。如何身世同風過，蛛網閒
生閉綺疏。君病中見先援鷄堂惜抱軒詩手假抄之，又因母老賣所藏精本書以供饒。

送姚麟樵 宗隔 暫歸鉅野

秋風動征騎，斜日背淮歸。客路宜中酒，還家莫掩扉。光陰三月易談
笑，寸心違再到。應懷我，鄖山碧四圍。

爲湯定之 滌 題其曾祖貞愍公手書小卷

風流名節旨遙深，千載湘纍共此心。結習未忘聊筆戲，閑情賦裏與
知音。

投老當時蔣阜旁，壺觴往復見篇章。漫援孔李通家誼，來讀先生墨

數行

遺疏能邀聖主知
楚南孤節至今悲
精靈各自迴天地
一卷興亡好護持

慎宜軒詩卷三

桐城姚永概

記夢 丁酉

伯子歿後夜夢之吾與仲也左右隨心知伯在目不見手把虛若無
所持肝摧意絕淚漣漉一人朱衣蟠金絲擁按頗具神官儀謂我既
死質早萎生者陽氣如朝曦由來分背路各岐我拜且祈邀神慈神
官顧我慘不怡手指案上丹成池磨丹塗目庶可窺何人驚叫醒我
夢情景一失無由追晨星落落曉風颯湛湛江水向東馳百年會有
相聚時伯其待我無參差

過鹿門山

微尙平生輕帆挂此朝灘聲喧客枕山色度船寮孟子何曾死龐

公若可招寥寥二千載未覺素風遙

習家池

落帆依淺渚遵徑得名區愜素心自賞窺古意有殊山木左右次嶺
勢東西趨障陂因漢舊鰲池開晉蕪高閣敞受風清泉寒鑑鬚闢堂
祀往哲結宇棲僧徒憶昔習文通攀附龍鳳軀灌田百萬頃作富方
陶朱漢水日侵蝕遺址非故模誰能築金隄保有此膏腴何況下流
廣更納百川輸平時稻梁地巨浸漂菰蒲深者宅魚鰲淺亦飛鷗鳧
年年費金錢塞決非良圖清游起時感返棹徒長吁

隆中

我來襄陽道訪古得隆中停舟過三宿留客西北風初行平沙際漸
進山籠嵒田田白水滿村村喬木逢中塗僧憇我前代梵王宮三里

入山口微徑依長松山開露萬瓦薨棟施青紅此行意不在山水就
中曾蝨人中龍龍行豈復戀遺穴樹石彷彿留餘蹤岡後三顧堂羅
列牡丹叢岡前抱膝亭扁字脩椽雄張濂翁所書草廬遺址在絕頂巨像
鑄石高穹窿山深地僻人到罕欲打百本知無從肅然心敬起再拜
忽有萬古來心胸老奸得志難爭鋒江東立國運方隆但取荆益作
根本坐令炎劉基業崇息心待變觀天意一出兔脫收全功隆中所
對年正少指陳已似開鴻濛荊州一蹶上將失欲向宛洛無由通嗟
爾孝直抑又死何人得制主上東當時君臣號魚水齟齬不異遭凡
庸英謀老策喻者寡鄭昭且爾况宋龔後來知己有承祚深心傾倒
諸葛公史傳叛例入集目一字尊與典謨同微文帝蜀避典午紛紛
千載受誅攻是非自古喜茫昧孰有巨眼著方瞳下階太息取徑去

風羶落日塵沙蒙

望武當山

青蒼無數重天畔吐芙蓉大似逢秋霽江南九子峯更聞盛宮觀雲
隙流疏鐘好待西風起藍輿相過從

入堵河

一水穿雲出輕舟抱嶺行樹多圍屋長石有絕流生馴犬搖飢尾雞
雅牛乳聲凶年今幸過稍喜麥場盈

泊葉灘

風響兼溪響縱橫集夜舟安眠親喜健枯坐客多愁兄殯三千里離
腸一萬周天河今夕影不肯向東流

寄尹白河

昌齡同年

聞道白河宰當官譽正隆菩薩心作雨霹靂手生風精力推黃霸鋤
強擬葛豐曾同賦秋鶚垂翅讓君雄

寄熊香海

九江詩人熊香海我聞其名已十載每過潯陽不一逢匡君笑爾容
顏改東林西林我舊游白鹿洞口泉巖幽但恨不到秀峯寺夢中想
見銀河流君家令子吾家婿爲說阿翁有殊契時時挾卷向山僧借
屋吟哦倏經歲佃租收了酒盈鍾霜林紅葉多行蹤姚家叔子督行
李報在匡廬第幾峯

九日招客登梯雲閣小宴傅丙初崑用杜韻卽席次之

侑觴不籍箏弦哀起看噉鴻色已迴流水有情環郭去秋山無數入
城來但須佳客同重九豈必悲歌上吹臺不見湘西舊漁父耽吟辜

負手中杯

丙初湘
陰人

古佛洞

竹山治

削壁當水會架閣平洞脣植欄拊歸翼開牖驚潛鱗茲邦近蜀漢青
山多嶙峋偪仄鮮開豁久處眉常顰今朝正少事招携及良辰曠然
耳目間故謝忽生新白鷗集灌木毛色姣以鈍永辭樊籠苦高下率
吾真

寄梁節庵太史

鼎芬

大江流湯湯楚山與之長遊子開風帆昏旦相低昂事業滿乾坤百
鳥有鳳凰客塵消壯歲容顏易爲蒼傳聞郎官湖伯牙素琴張古事
豈在茲標榜成遺芳知音不可求過者每傍徨寒磯黃鵠月夜洲鸚
鵡霜流景入奇抱著眼皆文章念茲想我友四顧何蒼涼惟有武昌

城遠在征鴻旁

杳杳雲間日離離漢陽樹秋光照飛葉載滿行人路行人未出門高
望多所慕舉足尺寸間無復猛虎步登高盼四海雲物日以暮征鴻
爲我鳴蛟鱷屢相顧嗟然誰足音欲喜且復懼千帆月送霜一鴈江
沈霧客途易懷人意想平生遇

南天有客星曾是瀛洲人探籍到木天前席窮鬼神平生憂國意多
由侍從臣龍鱗偶批拂遂爲諸侯賓滔滔江漢水遲遲愛日春波濤
納羣流不遺土水身臣壯不如人慚荷一山薪趨庭移急棹造榻成
別辰歸舟望大別斜陽照行塵白雲蔽襄鄖轉脰念衰親

舟行口號

人家隱約石林中夾岸陂陁漢水通柔艣一聲山轉處麥芽吐綠柏

敷紅

鄖陽過了又均州霜氣初濃曉夢幽漫啟蓬窗放朝日武當寒翠壓
船頭

層臺巨礎想雄風不見當時靜樂宮惟有負碑雙鼻頂供人憑弔夕

陽中

均州靜樂宮明永樂十六年建
今只二碑亭存餘皆焚盡矣

夜泊寒沙夢不成起尋殘卷讀縱橫遙知背燭垂羅帳倚枕無言數
客程

黃鶴詩篇竹樓記表靈自古待名流穀城山色漢江水空負人間霽

景樓

樓在河口丹碧壯麗
瞻顧雄拓而無盛名

漢臯亭俯漢江濱江上風光日日新打槳唱歌多女伴不知誰肯解
珠人

羊杜遺風未覺孤
峴山待我城東隅
不辭清淚爲君墮
只恐碑才一片無

一日輕舟下五灘
歌呼不覺堵河難
却思六月來時路
百丈牽江逆怒瀾

輕雲避日開霜霽
賓鴈驚寒作晚啼
今夜夢魂雙繞處
桐城東下竹山西

東風釀雪作微寒
鄉夢初回月滿灣
喜報朝晴送雙漿
推窗飽看鹿門山

樓銘價重比瑤函
開府能知客不凡
那用投文弔黃祖
於今爭憶畢靈巖

汪用中事

贈高麟洲

多祥戊戌

少年喜文字直往刺其肩編簡扶弱志因與泛滄溟子師吾所友與
我道固一臭味不嫌岐在藥譬烏朮秋風揚州郭虛館無足音子來
通吾門一見起我瘖深言移短景狂語回星斗甯與愈修翔勿居籍
湜後吾鄉文章藪要惟天下公豈如彼釋子開堂振宗風小知目一
孔妄生分別見古來聖賢人是爾相遞禪青青東海山磊磊桐子國
會合自昔珍贈遺各努力

戊戌秋中書感

孤月驚揚已斂輝紛紛狐鼠煽陰機虛傳天位能移易不信人間有
是非新議欲親豐沛種募兵近隸相公麾臺垣封事朝朝上到此何
人血灑衣

此變乾坤古未逢盱衡唐漢略相同早知訓注才非正無那膺滂死

本忠失水神龍堪一痛垂涎禹甸有羣雄腐儒難繼陳東迹中夜悲
歌和朔風

書憤五首用杜公諸將韻

有序

月在荒落人客廣陵感沂水之新聞觸膠澳之舊恨陶元亮桓
公遺胄心抱孤忠陸放翁宋室小臣詩多積憤適安定書院山
長發此題校士輒仿其格成句如左

東迴鐵櫂指勞山滄峙天成海上關藏壑樓船空域外負舟積水自
人間龍旗不分連營拔犀火無端照浪殷辛苦中朝談攘外竟貽憂
患變宸顏

巍然廟貌遍名城俎豆堂驚駐旆旌不見金絲傳舊壁豈無尺一詰
驕兵泰山拔地終知仰滄海橫流久定清太息諸生羣上疏忍將粉

飾換輸平

三年兩見報邊烽蕩蕩青齊殺氣重東呂未勞三箭定瑯琊難用一
丸封要盟早識秦先背伏罪猶辭許不共十萬羽林誰健者黃金虛
擲困司農

太守聲明杭峻標萑蒲小醜自言銷丸探赤白存魁宿轂轉朱丹位
竄寥齊魯山河歸畫戟沛豐門戶總金貂攀鱗子弟今心腹莫遣強
鄰徑扣朝

海外名王小隊來東朝宴見事堪哀漢宣曾館呼韓邸周穆虛成西
極臺宰相橫磨誇利劍書生新恨付深杯世間那得桓司馬捫蝨徒
憐景略才

紅巖寺

屬鍾祥
己亥

紅巖寺前風景多，
篋輿薄暮相經過。
雜花時發照人艷，
好鳥自轉當春歌。
淺溪抱村作詰屈，
小山戴石成陂陁。
炊烟晚起道旁店，
解裝一飯心神和。

曲江觀濤詩

用三江全均並序

廣陵之濤舊說多異，惟汪容甫先生之言爲確。其引山謙之南徐州記，蕭子顯南齊書注，尤足見古今情勢之變。枚乘七發，自晁无咎謂爲諷諫之作，近張濂亭先生復推其意，蓋乘本以諫著名，則斯言不爲無因而於觀濤一篇詞意，尤顯其稱濤勢之勝，以喻漢兵之雄。所謂折其邪謀，故曰發蒙解惑，不足以言也。然則此太子者，非景帝提殺之太子，乃與王濞同反之太子也。今輒用汪氏之言，以定濤之所在，用晁氏之論，以著文之本旨，而盛賦之卒歸於懷古庶合今日之

實非逞淫侈之觀者比也

有客訪古來名邦秋風著岸停吳艤昭明選載枚叟筆廣陵濤勢傳
曲江天長以南甘泉城西山澗窄才通疍低田禾稼高田黍人家籬
落垂紅豈紛紛下垂競作莢名種廣雅收蜂巖村徑依微尙可步沙
町散布猶能糴今時平壤昔巨浸張融賦海稱江淦迂生不知陵谷
變每逢論辨心先懣東海桑田已三見仙人來往從羣媿正如夏陽
才一葦漢家辛苦費罌缸會稽掌故欲奪取稱說伍相辭徒厯錢塘
有潮不自饜更思旁攫毋乃恣謙之南徐舊著記江乘郭外浮煙雙
春秋分朔輒應候由南激北濤飛淙江乘揚州正相值斯語妙息羣
言呢南齊書志出蕭顯索解更可祛黷黷刺史年年有故事海陵秋
出擁旌幢單文孤證人信得此能令吾言雙詞游理絀不足難縱

有巨筆誰敢扛憶昔吳淠受封日招致賓客聯駟駟羹鹽擅海久筭
利鑄錢鑿山或逢邋築宮自用青連瑣除吏都乘赤畫杠東山府滿
盛珍怪長洲苑廣饒薤汪謝病竟蒙賜几杖邪謀蓄腹終未降是時
鄒枚老賓客彈冠不類空谷墜秋獵常携白羽箭夜宴時明金碧缸
苦言至計逆君耳忠肝熱血填臣腔引秦爲喻意惓惓奏書以諫心
恹恹七發辭緣太子疾正欲拔彼枿與椿振聾頰奏靈鼙鼓詞危何
異聲辭辭到今披讀有生氣想見濤勢橫天撞初如白鷺翔未下草
根蘆末鳴蜩虻進如車馬著皜素迴旋眩惑雙眸矐起如泰華高突
兀落如大隧虛豁磴遠如營陣屯萬騎近如官舍傳千柳旁搏恍扶
烏獲鼎飛騰類上都盧橦朱汜無涯忽泛濫赤岸失勢徒崆峒大聲
轉地武夫噪盛怒薄陸長矛鏃垓下圍堅取困籍馬陵道狹收窮靡

錢王鐵弩難射落何當遠聘羿與逢少焉散漫變平行跳珠亂捲猶
縱縱發音清異絕凡俗江妃玉佩交琤縱傾聰駭賭蕩魂魄躊躇莫
進獨踣躄祇今擬似境尙爾何況當日衆所眩正逢四海爲家日閻
闔安宴無驚虜岳陽可泛洞庭水嶺外不險昌樂瀧覽勝招朋策小
蹇讀史乘暇開晴窗山川已變陵谷改惟有懷古情搃搃

送周味西觀察

學銘

之京師並寄仲勉

交親兼道義相送意難任獨鶴淚清字饑雅戀舊林子持千乘器余
抱一邱心坐看閒雲出將爲何處陰

津沽昔日儔似水東西流尙有阮夫子還從哲弟游境空遺迹象道
勝等薰蕕不見斯人久寄聲渤海頭

寄方常季

守敦

樓上朝霞映牖明倚欄清興定橫生予情遠共青山色直渡寒江更
過城

龍井關 辛丑

兩崖峙若門微徑緣其間泉高春壑震石厚摩天頑誰歎役物智斷
險築雄關眉題益陽公規畫窺一班殺伐本爲民保全出痾瘵數武
忽開朗溪水隨田彎桑麻被平麓雞犬帶闐闐茲地當咸豐不見賊
旗殷屋舍太古意女多盛時顏豈伊險可恃亦非偶免患向無多李
徒連營甲晝擐誅焚那弗至何得長閑閑自古國在人撫今雙淚潛

自笑

自笑生涯渾似蟬頭顱已受二毛侵直須下視九萬里安用勤繙十
二經夢寐鄉關山厯歷江城風雪歲駸駸憑君買盡高樓酒澆破胸

中偏仄吟

贈歐陽潤生年丈霖卽題其真

走昔謁翁在揚州天寒欲雪雁叫洲滄溟濁浪高山邱腥風掀簸翻
蛟蚪北門之管危繫旂飛芻漕粟徵貔貅一隅牽動東南舟翁長八
尺膽如斗架上詩書座上酒揮髯談笑天下豪好士風流世罕偶說
我真能不容口警然未見六春秋昔歲直馬今直牛翁居桃葉古渡
頭我亦萍梗適然投覩刺倒屣問所由家國百變餘恩仇平生四海
一羊裘天球不琢金百鍊風采奕奕開生面索我題詩慰繾綣想當
壯年宰壯縣區畫雞豚賣刀劍父老謳思兒女戀祇今老矣才猶健
冠冕江南衆爭羨江南千里一葦杭朝發建業夕鄱陽翁雖宦游如
故鄉郎君新卸日本裝咄哉車輕馬又良新法政爾須紀綱父子宦

遂聲名揚行取將相宗
邨光吾徒不遇夫何傷

陳伯弢銳見示哀考籃文戲贈

四海投身正多門
姝姝勿守三家邨
驂馱萬里悲晚晚
雅雀九衢爭啾喧
春風冷斷小儒夢
秋雨夜哭大官魂
老漁不作得魚想
醉眠一聽筓亡存

懷挂車山廬

西山濃翠擁衡門
雞犬圖書聚作邨
麥釀辭牀迎鼻暖
竹輿迓客壓肩喧
風波不信留今日
死喪無端黯舊魂
垣長紫苔窗出菌
豨獮秃柏爲誰存

和賓南寒雁均柬伯嚴

汝從北極別金門
江北江南無限邨
畢竟雪霜來較晚
其如儔侶衆

猶喧欵斜慣寫天中字安穩深棲月下魂繒繳漸稀菰米大舊時鸞
鳳數誰存

袁綬喻戶部

緒欽

別於天津酒樓金陵重晤痛談今昔疊均奉

贈卽送其明歲北行

妖星睽睽照師門烏鵲南飛各覓邨忽漫相逢兵甲淨翻思盛會酒
杯喧變衰莫醒長酣夢歌哭難招未定魂車騎待隨春共北五陵佳
氣許終存

離離

離離瓜實出青門忽漫聯翩天上邨抱蔓不堪逢再摘移根何計弭
羣喧播糠眯目誠戎首飄梗隨風是斷魂至竟紫微輝御座高高九
廟百靈存

義甯陳策六言伊州每橘一株歲獲錢千枚若種千株當得千

萬矣欣狀作詩

萬株江橘繞柴門那得饑寒到此邨一卷騷成終見頌千頭奴擁不
知喧黃柑子厚成林願丹荔東坡去國魂二老奔忙良爲口從來種
樹有書存

去年游潛山石牛洞寺僧言早歲金陵有人携拓工到此宋元

以前題名悉打本以去今冬晤繆小山編修荃孫談次卽其

與劉鉅卿觀察世珩徐積餘太守乃昌之所爲也漫賦一篇

贈之

天柱峯前蘭若門石牛洞口野人邨何來巨手剋苔蘚頓令空山文
字喧豪舉定非俗客辦疑團喜破隔年魂便教著錄進歐趙江北風

流賴汝存

洞旁有山谷寺
土名野人寨

館夜

簾幕翻翻風到門
柝聲嬾漫夜如邨
最憐桂樹蜷枝蠹
微覺芭蕉敗葉喧
秫酒醉消蠻觸戰
芸編深護聖賢魂
年來憂患侵雙鬢
湖海豪情百不存

鍾山紫霞洞觀瀑偕宗受于

家祿

梁公約

葵

方孝深

時涵
壬寅

窄徑挂石齒連磴
升雲峯入門一衲古
到耳千杵春窮幽
牆佛背大叫與奇
逢乃知昨夜雨孕
此雙白龍垂髻下
絕壁噴沫濕長松
雖無千丈勢已豁
平生胸何時二三
子杖策永相從

謁明孝陵

元氏殫兵威靡堅
當不脆况此殘宋
餘掃之安用彗徧
設行省司撫

有幾百歲斯人淮泗起乘彼運方敝遂率徐常徒保我黃炎裔英風
凌九區遺澤延十世所以先皇興每過親致醞煌煌豐碑上猶留兩
聖製我來屬孟夏草木青蔚翳不見金碧宮但存塼石墜東南岡若
環直西闕無衛旁難置萬家殊乏深雄勢何必奪誌公毋迺損明叡
繼古起壯心睇今隱悲涕人材數廊廟不及啓禎際睢盱列羣強衆
狼嘷一彘測後未知終方前無比例國權去漸空民命危若綴誰能
奮羽翰吾欲從茲逝

游靈谷寺飲八功德水

運會有汚隆懷古悲橫作不如招提游且就清閒樂松光泛衆嶺竹
影專一壑鐘杵裊餘音嵐光釋新縛席薦澗蔬香鑷煑石泉活吾聞
茲山上有泉名一勺名高動貴人軍持爭求索又聞雨花臺日供諸

衙酌每當秋賦時門有走卒格豈若茲谷靈神龍於焉宅量腹擇所
受不論石與龕日斜風徑涼攬袂下僧閣巖桂秋芬時重來亦不惡
濮青士太守招同外舅徐某存先生游張楚寶觀察士珩君子

居直雨歸賦

主人雖不在客到許開關竹鶴健方乳茶奴朴自問樓巔依獨阜木
杪覽諸山二老豪殊甚爭誇戴雨還

壁上徵題字猶多長者書瑞安今已矣順德後何如

孫琴西太僕為
先子故交李芍

農侍郎吾與
楚寶座師也

寥落一身在荒茫萬事疏生涯付天演不爾向空虛

馬車路上望鍾山雲氣

雨餘夾道柳條長壓堞峯巒一倍蒼直悟世間無靜物白雲何事也

奔忙

陳師曾衡格爲畫西山精舍圖賦謝

陳郎知我苦憶山弄筆戲向宣溪白須臾掃出好林巒便已置我當時宅此中有屋雖不多頗闢隙地安書冊當門百頃著意青南流水無心碧陳郎陳郎君知不樂事不數公與侯堂上大母杖白頭種花一院蜂聲幽家公四十官罷休督率兒子詩禮修往來文行皆顏游時時貸錢買江舟西登匡廬南莫愁秦人枉向桃源求此中樂事誰與儔十年江海同漂浮盡捲歌笑歸山邱惟餘雪涕不可收冰幅展似縱橫流春風新芽茁雙井東傾彭蠡浸晴影前有涪翁今爾翁山川信美吾心省陳郎何不持此筆寫爾故鄉清絕境

次韻贈王紫裳太守詠霓兼題其鳳陽唱和詩

先生白髮舊郎官曾覽滄溟萬里寬奉命副持蘇武節馭民深薄惠

文冠篇章每屬孺人和筆研時煩小吏安猶抱閒情爲樊素繡衾悵

對昴參寒

詩多悼小婦朱作

淮甸微茫思禹功奔流下注古今同重臨爭喜東坡在臥治羣推長
孺工入幕佳賓胥上選當關詩客許晨通最憐國是無人定都付新
編感事中

掣電芳華卅六過班生素願竟蹉跎虛名未可占南斗洗甲長思挽
玉河涉世眼看朱作碧終年人與墨相磨校量亦有堪雄處接席平
生長者多

郭外清江作帶留浮空嶽翠照江舟棲遲竹裏開羊徑款段田間羨
馬游學校喜還三代盛榭楠坐見一時收泉比慙愧分餘席碧水丹
荷送早秋

用吳先生韵謝爲先子作墓銘

先人富貴等鴻毛老絳微官不告勞獨以詩篇寄芳抱從無盛譽閑
秋濤淒涼坊墓成今日寂寞瀧岡待異朝賴有平生風義在銘章痛
抵楚辭招

過女得弟墓

女塲年十
二癸卯

廿日前猶記繞裾誰教弱骨委溝渠文章騎省哀金鹿歲月昌黎誌
女挈守墓荒樵能護汝映山松響似呼余他年縱有成行樂到此猶
應慘不攄

江閣觴早川東民方荷齋旭卽送荷齋赴日本

鬱鬱羈懷久未開今朝欄楯得徘徊春知花柳縱橫甚晴見江山復
杳來東國名儒專几席西川賢令共鱗鬣蓬瀛此日風難阻浮海居

夷顛子陪

立秋日宿分水嶺

歲歲經過識姓名折蔬開甕主人情
風翻木葉秋先覺雲近山根雨
易成追舊忽驚餘後死依人強半過
勞生夜闌懷抱誰同盡自就匡
牀看月明

卽事

殘暑真如酷吏箝那堪日日逼虛檐
濕蠅黏背殊難掃好雨成風又
謬占隱轟雷車走坂明明新月鏡
開奩濃雲只傍西南嶺不向江
城逐暮炎

七夕偶賦呈方倫叔王滌齋

源瀚徐鐵華 經綸

口開不合語常筓豈有清風自墮檐
鵲尾盼傳天上巧蛛絲浪費女

兒占蕭條桐徑陰垂檻的礫荷房子滿奩畢竟商飈能解熱未須冰
飲已驅炎

將之通州先寄肯堂並追弔吳先生

死快當時謗者心生存一舸漫相尋年來白髮鑷未鑷望裏青山深
復深海國秋潮傳雁信江天暮雨起龍吟書生枉下窮途淚如此神
州豈陸沈

歸營建縣學堂未及十日仍赴郡冒夜行午到原潭鋪感賦

青山半被驛塵遮百里征程一日賒已坐迂疏甘谷底仍將勞苦送
生涯招風欲解崇朝霧引水思栽異日花東望七陵西五管却愁襟
帶未堪誇

和倫叔生日用姪女符曜韻之作符曜爲吾葵姪所聘

文書垂世欺君耳要妙曾無百一傳歲月堂堂頭並雪情懷落落酒
如川深山何處能安屋小海成歌且扣舷風韻兩家到兒女自將樂
事付蠻箋

次韻和早川東民感事

陰符長劍伴孤眠突兀儒冠欲著鞭峭險可邀秦帥路孟諸誰道楚
人田猶存寸舌生殊足未溺餘灰死或然終是虢虞同命日共招大
鳥待調弦

遣興

林檎一株光燭天祇有西府許鬪妍龍眠百本蕙爭放豐臺芍藥藟
應圓門庭寂寂春相映大婦衣衫小婦鏡問君何以不思歸欲買桑
田待將迎

宣家店

店惡不堪宿山邨無別棲蔬盤來鼠雀人榻伴豬雞守舍叟半僂看
場婦盡顰誰將養生理一爲化羣黎

懷肯堂

安能如俊鶻一瞬見通州化我心成藥醫君病使瘳夢通終覺遠書
到祇言愁白髮憐吾姊諸甥又浪游

慎宜軒詩卷四

桐城姚永概

質言五十韻贈桐城學堂諸子

甲辰

盤銘重日新易首強不息况當板蕩時競存最激烈急起猶恐後稍
縱勢將脫學校三代規渺矣風久歇利祿導孫宏科舉自唐設從茲
天下士奔走救饑渴煌煌聖人言躬行爲之的奈何上下間剽襲兼
割裂吾道等倡優傷哉那忍說環球數十國風氣日騰蹕生民利用
事一一自學出厥初已驚駭猶疑但實業富強雖有餘根原或不足
孰知造微際精神有教育或稱忠愛心或曰團結力經營貴公利保
國重元質器與道俱進標共本不失凡吾經典言及吾先王法我或
視爲迂彼行盡無窒所以明哲士對之五中熱罪言達九重哀痛詔

屢發母子矢一心此甯不迫切生機一綫在莘莘學子室吾縣五百年文章與名節聲名冠天下老輩傳心血東國得名師經濟及法律蒙養設今年春芽行可茁又開師範議漸變書院轍南楚暨東瀛負笈踵相躡鄉老改夙心鄰儒起敬色消息豈不佳深慮轉反側毅力生有恆自由出守秩坦道儻不由或趨入荆棘平權便私圖競爭逞私鬪公德嗟已微私意紛然熾詎知東西邦學校重秩則德慧困生藝術由苦得豈其舍己田而芸他人域豈其忘己愆而責他人慝豈其絃歌地而聞喧囂沸豈其精進心而爲怠惰掣人尊由自尊植人先自植少壯真可喜勿負好資格勿忘國家仇勿使名譽缺謗者日伺旁奈何授以隙人才本學問要各盡厥職智勇本深沉人喧勝以默熊虎耽四鄰決非徒手搏雄飛會有時努力養羽翼鄙人無聞

矣再拜陳胸臆

題王伯唐兵部鐵珊遺墨

國是誰顛倒相看盡
哺糟無聊捐俠骨
有恨托柔毫
主辱臣能死
官卑論自高於今
數廊廟忽忽又卿曹

斯人吾所嚙不意竟千秋
潦倒郎潛底佯狂燕市頭
伶人司計錄紗

服當春裘意態眼中見
遺文未忍收君嘗為予言不能會計昨召某伶為勾稽一歲之用又嘗以三

月著紗袍見訪相與一笑

憶女

墳上離離草今年應更青
愁來須一痛恨甚祇孤醒
汝母涕常墮吾衰鬢
欲星固知生本寄所惜在韶齡

苦雨遺悶

瀟瀟春雨長江波賴有深杯助睡魔一覺隔城聞浪駭夜深氣舶鼓
輪過

春光彫蝕三分二風雨無端不肯晴桃花已分隨流水苦筭何時與
長成

趁潮魚鰲故喧虺倒海移山勢盡迴可憐袖手任公子長怕波濤壓
屋來

經旬下簾不出堂一任風雨自顛狂祇恐雨收雲散後風狂不可更
禁當

錢復初 同壽 屬題華亭封君閉門養晦圖封講宋學多藏書兩
世不應科舉

雲谷編函照古今龜堂詩有國家心不知門內客何養但見苔花一

寸深

科第從來屬俊髦那容風漢姓名叨憐渠司戶還多事爭似先生自策高

儒者久爲俗詬病宋明尤與世相疏堂中藏目須抄借好校人間不急書

手澤杯棬先世恩楹書定有注丹痕勸君移著山深處海水年來恐到門

題胡敬庵

元吉

蓮塘圖

萬山迴合結茅茨玉黍新春可療饑莫種桃花臨水次人間漁父恐教知

抑齋程先吾所敬朱生少坡亦多聞好持胸中三千載山堂同話一

窗雲

程名朝儀朱名師軾又君
近深史學編課本甚勤

鱗鱗淮浦作邊城陸子謾言老太平今日春風許常在不妨自守短

燈檠

生長兵間老太平
放翁蓋謾言耳

君談河洛從戎事眉宇猶傳萬里心祇恐繞籬新竹筍未容相伴住

山林

君嘗從于次堂
中丞河南練兵

方劍華鑄返里談次感事

春歸有客帝城還為說風光異等閒不管興衰總蒼翠無情畢竟是

西山

送劉葆良觀察

樹屏之上海兼問夏穗卿曾佑

與子相知十載前皖江蹤聚條三年人才新舊將誰恃國病膏肓敢

望痊夏雨每為山約束晴雲喜逐海回旋未秋巢燕辭梁去落照離

帆倍惘然

臨別無端意不忘談詩一夕小池塘爭知格調宜天寶其奈情懷近
晚唐菡萏有房心未吐梧桐無淚繖空張因君舉似錢唐客或有微
言醒我狂

平生

虛窗不寐檢平生持比前賢略可名魯國朱游羞見吏江東羅隱本
名橫高懷未敢逢人盡濁酒猶堪使氣傾華髮漸多元髮短從知無
夢到公卿

寫憤

弱肉難禁餓虎嚙書生敢說我王犀數杯濁酒不辭醉一片殘陽尙
戀山橫議何心憂族類輸平浪覬保河關王官谷裏千秋恨爭奈人

誇疏皓閒

有感二首

徑寸山苗不耐風只期湖底有喬松那知攘臂高談者處士諸侯罪
略同

大廈原非一木支林宗早計本無奇高高乾象吾難曉人事於今已
可知

鷺羽潔白西婦用其首髦爲冠飾華人爭羅以逐利數年來環
吾縣數百里此種殆絕七月赴郡過練潭見一鷺於湖上意
態間逸如逢故人喜與感並遂成小詩

天意存茲種今朝眼忽明江湖秋水闊好待羽毛盈
虐爾豈他族吾爲萁豆悲不知援繳者何事苦相夷

寓陳伯嚴宅卽次其集中見寄之韻

三年不見如疇昔連夕傾談抵報書
寒水依然未增減名花猶是略
蕭疏輸攻墨守都無敵城火池殃
或警予兀兀短檠緣底事可憐非
馬又非驢

江甯晤魏季詞

繇

訪其新居不得却贈兼感其近事

聞道新移處士家大中橋畔訪仍差
笙歌隔水飄燈遠草樹連城入
望遮謁帝應逢闈似鬼出門未辦馬
如蛙
菱菱粟肉從增減一卷疏
簾香篆斜

贈朱仲我

孔彰

湘鄉死矣好士誰長洲朱翁老涕洟
家寄淮水身孤羈兀兀坐守破
書帷憶昔中興奮鼓鞞四海新拭
舊瘡痍幕府充溢皆權奇猶復羅

致古鬚眉翁時年少聲已馳抱持家學能鑽窺公獨一見卵翼之秦
淮風暖春漲漪賓從絡繹盛光儀白門柳色元武陂至今想象涎流
髭大星中隕將佐隨國無人焉勢不支况彼新學競恣睢以故方之
風坐雌斯賓達文互騰躍盧梭孟德爭醇醜六經諸子且束閣那復
肯顧翁所知我謂如翁未可訾士才各有宜不宜譬彼秦漢逐鹿時
淮陰自擁大將旗亦有伏生保闕遺一朝右文求儒耆門生都起作
大師翁今七十何所爲分當避舍年少兒絕學一線默護持高咏懷

賢百首詩

仲我有懷曾
文正詩百篇

贈吳彥復

葆初

吾家墳墓大凹山與子分占東西間山巔出雲散四字飛灑南北何
由還十年遇子丞相府綠鬢朱顏各華嫵飄零海上再相逢吾衰甚

矣君何取

贈嚴幼陵 復 卽送其赴倫敦

先生老矣心猶壯落筆能傳異域書欲發天聲通國教肯巢遺籍向

空虛

二句皆用東野詩

相逢已過此生半深語甯嫌識面初淮泗古來豪俠

窟風雲今日定何如

末卽嚴所深語

冀守風流不可攀雄文絕識許君班論才欲合東西海歸隱知無大

小山白雪楚歌屬和寡黃金燕市築臺慳大招挂壁無人穀近喜翩

翩肯受彎

來滬數日肯堂亦就醫到此吾姊偕行相見喜贈

別來幾日鬚都白我到中年子應衰歌哭隱含三古憤文章自寫一

秋悲尊前骨肉須勤問後世淵雲未可期莫道委形從物化有身端

合付靈醫

由郡歸舍途中感懷

兒在江南親帝里歲寒同返此途中山頭臘雨成微雪道上堅冰變
野風衰面不因村飲熱童心無那戀歸恩九年事往都陳迹處處經
過恨未窮

凍梅歎

二詩皆聞
肯堂訃作

牆根老梅手所栽天葩照眼當風開十五年來共肝膽惟汝於我無
嫌猜今冬暄暖花仍吐特闢軒窗原爲汝如何一雪閔陽春使汝飄
零不自主

伐桂歎

窗前老桂性所愛直幹撐空無媚態深宵霜露飽與嘗高秋精爽誰

堪配死去根猶徹九泉焚之香可揚青天世間草木芟不盡嗟哉桂
仆淚如迸

題倫叔調刁集

方子吟詩老愈耽江樓日日看朝嵐人言儀衛傳家學自說曹溪一

滴甘

君爲余言生平學
詩由先子之一言

懊惱君詩似建茶每從苦硬見風華不須持示安昌輩骨鯁妖邪性

本差

三十年交我最深送行憶遠費長吟不知髻也何多事如此疏頑許

賞音

除夕

除夕一杯酒臨歡不盡觴年來何物多親故淚成行吳徐所嚴事蕭

君父執良如何兩歲內各各歸山岡我友有大范情好等潘楊海上
三日聚竟爲永訣場飄風天際起胡雁還高翔豈惟桃李落松柏亦
摧傷胸中可著人漸如曉星光逢迎但俗物眼底殊荒唐

喜仲勉歸自天津賦贈 乙巳

阮公抱高懷威鳳翔天際瑞采仰賢愚清明動奴隸子產畜生魚心
許悠然逝季世校人多百欺不與計回首三十年締交從弱歲見必
引義爭退輒服深詣古之真人與披胸秋月霽默數親知中惟許大
范儷前年別我北走應周侯幣今年忽南歸老矣思就憇乾坤一空
囊家國雙流涕小男書當學猶子戶可替田園忍荒蕪棺槨勤瘞窶
男兒生今日深淺隨揭厲君看范夫子蓬科了一世

寄李健甫孝廉 松壽

太白源風騷杜陵兼頌雅鬱勃忠孝懷流轉饑寒踈此義遺山來到
今鮮作者豈乏深雄才境或不相假觥觴澶州范奮起百代下同時
張與吳不自居陶冶意氣無韓蘇沈憂類屈賈屯蹇五十年一棺戢
荒野公子嗜好奇愛古勤搜把更作千秋謀雕印出廣廈抱潤筆真
雄素園經世寡平生三不如欲以名應牙儻是吾言乎斯文金玉也
借子椿兄三芝庵展墓歸宿西山精舍

淒涼始甯墅寂寞浣花村當時兩賢者白首負前言惟餘詩卷上磊
落大名存至今讀其詩山水縈清魂我自江上來入山甫兩日墳墓
寄庵僧柴荆開舊室椽芝檢漏瓦壁字徵先筆兒童競繞前問年十
六七殷勤屈指計盡是別來出烹雞飯顆腴熱炭茶香溢中宵大雷
雨條作四山秋青燈照不寐檐溜聽颼颼吾父與若父昔年互唱酬

此景時共之兄亦偶來留於今兩孤兒追述梗茹喉世豈有仙人百
年若雲浮聖賢與豪傑一一歸山邱丹青本難至蒼生何足憂山田
稻已下廢堵茅當求吾家老兄弟好作一身謀

高等學堂本敬敷書院舊址吾家惜抱府君曾主講於此睠懷
今昔不能自默成詩一章

皖城枕長江入城山蜿蜒書院有遺址據阜獨茂圓吾家惜抱翁講
席聚羣賢經亂鞠茂草廢棄三十年疲民架小屋學官利租錢遂使
文明區過者每慨焉國家際艱危欲救若無緣近仿四裔製遠追三
代前分縣徵俊髦按科纂新編所學期致用不在鞶帨妍鰕生亦何
挾擁此高堂託仰頭愧家學縱眼驚運遷維昔乾隆時威稜澹窮邊
大子右文史羣公矜古先長老守閭閻後生寶管絃繼聖得嘉慶盜

連陝湖川命將旋誅夷國勢猶完全奈何到今日繫絕難再縣手足
既斬削腹心日以穿我聞同室門纓冠不爲愆救火白大人毋乃太
侗儻垣墉徹四周積雨方纏綿畚築既未具又缺棟與椽誠恐後時
智不及車薪然永懷吾家翁所遭竟異旃

雀麥

野田有黃雀麥長矜芳菲羅者四面集庖者畜眼睇銅厯爲汝棺火
光爲汝衣汝羣不足恃汝肉徒自肥智不如元鳥營巢知所歸鷺不
如鷓鴣秋空展餘威此田亦云廣恐非汝疆畿此麥亦云美不許汝
啄噉汝今不自奮左右避辟機終然類殄滅感物淚長揮

太和王建侯大令

樹中

仙人掌開花作圖徵詩

太和令君明且慈一身作官兼作師堂上壽母堂下兒四境歡喜笑

發眉政成譽美上官宜封章早達天子知生祥下瑞到花枝掌上忽
吐嫣然姿辦如山丹稍剛硬色如菡萏分葳蕤寫圖示我徵作詩我
詩豈是國風遺放此和氣塞兩儀奇鬼不瞰民無疵不數麥秀誇雙
歧更云漢室宣房芝

有感

平生文字任吾真漫與安知世重輕師德固應乾面唾田巴何惜禪
鴻聲胸期浩浩論千載俗議悠悠闕一秤天柱峯高泉百尺徑思長
往濯塵纓

慎宜軒詩卷五

桐城姚永概

雷 丙午

疾雷破柱太無端涼燠輕更號令難已分
菜花殘夜雹更教桃蕊避春寒披猖玄武真乘勢惆悵青陽也失官雅雀紛紛來復去從今一例作風鸞

德國克虜伯廠鑄李文忠公像在上海徐家匯祠園內四月偕倫叔瞻拜歸而倫叔有詩和之

卅年危局仗斯人一像崔巍立海濱風采略殊平日接江山已改戰時塵檻前異卉多新種室內名花過晚春
園中皆外國花芍藥二盆在室尚茂公是公非今定矣橫流滄海共傷神

送王紫裳太守上池州

池州又得詩人守不負雲端九子峯久宦帆開江路熟清游尊許故人從一壺聊勝東坡寄百感橫來杜牧胸若見才如吳次尾爲言雙壑待喬松

游武昌各學堂梁節庵廉訪

鼎芬

以詩相迎次韻酬之

樹蕙滋蘭世有人垂楊祇數武昌春花濃到夏知曾遍種好非君定孰因六載雲煙過眼速百年霜雪上頭新清吟迓我真成感欲和深慚筆未神

陳介菴同守

樹屏

招登黃鶴樓感舊用前韻謝之

一舸曾爲泛漢人江花江草不知春忽逢騎史能將命頓覺歸裝喜有因風景不隨流水逝山河常對夕陽新共憑危檻凌高鳥述往悲

今只愴神

寄懷賀松坡刑部

濤

北方盛文學惟深與冀州兩州先後間臨茲得吳侯養成鸞鳳羣一
一和鳴球深州子自出冀州子所游王良調驥馱子質佐其輻癸已
客蓮池相逢談笑展相許在韓歐題我西山卷一別十三年海水嗟
清淺國運同再興朋交艱一眄長沙今大賢持節皖山前袖中出鴻
文乃子贈行篇上陳根本計下叙應求緣篇尾綴及余甚慙故人專
吳侯棄斯世子亦厭人事獨抱胸中書老臥燕都肆惟有長沙公憐
君暮憔悴聚必授衣餐別猶勤贈遺遠矣此高風人間未易致鐵梁
絕大河軌道南北直山川失險阻迅奮等羽翼子老不能南我懶無
意北朗咏雲龍什惜哉長相憶

詠常季庭前萱草

階前忘憂草乃作黃金花六出向我笑鬢端綴粟芽君持杯謂我所
憂胡瑣瑣酌酒對此花自計未爲左我思植瑤草灌以醴泉流枝葉
日茂美佩之百疾瘳世間閒草木那得解余愁斯言儻不遂願逐盧
敖遊

五月十六日微陰訪倫叔值其將出觀荷小語卽別已而荷花

三枝新詩二章並至次韵酬之

訪君君欲出猶喜在門逢莫阻清游興須乘日未紅

新詩與花到如雙美出暮久對轉缺然扶持少葉碧

和徐鐵華五月十九日雨次韻

徐君示我詩颯然却炎暑鋒能擊鷹隼氣可吞龍虎君居市囂外石

磯臨江舉門前萬里江東流未肯處小船如鳧鷖張帆呼其侶大船
若鯨鯢鼓輪恣激吐聲響倏不見但有烟一縷君猶歎物逼譏嘲蚊
蟻聚何況闐闐中市兒所歌舞腥羶衆爭嗜競進緣門戶我能飭六
丁捕逐出在所但恐醜類盡鸞鳳反愕顧不如天公仁沛施三尺雨
羣蟲各收囂衆穢潛下土階前鳳仙花娟娟似好女沽酒已滿瓶買
米欣開庾瓜瓠壓頰肩喜色到老圃與君易了耳何事愁旁午

仲勉子善同集倫叔齋小飲余戲拈首二語邀倫叔子善同賦

前庭有修梧後院有高竹是惟詩老居鬚眉交映綠阮金古衣冠頗
饜新學術與我成四子吾道固不獨坐久索壺觴交深忘邊幅從來
坦宕人最喜披胸腹蚊老有奸心畜口伺閒隙亦時挾其朋轟然雷
起谷茲地隔世囂涼階露如沐么麼蟲豸耳秋風來不速

倫叔既作長篇又和余原韻再來徵和

前日余戲言發難起梧竹遂動詩翁興抒懷借新綠長篇寫狂字馳
价走橫術和章復挑戰不使余守獨猶存勺園意一日成數幅當時
吟嘯儔回首痛在腹二十三年矣豈止駒過隙古云江海下所以王
百谷盤匱苟未具頭虱何從沐不如從公言平視運遲速

歐陽笠儕觀察述用前庭有修梧韻三首索和

肉山肥若瓠髯苗森似竹

子善體胖
倫叔美髯

江城六月中偕我就寒綠五言

互酬倡藉作逃暑術固知冠蓋中有人妬此獨笠儕詩家豪一夕和
連幅發君桑梓思羨我藜藿腹髯也本好客瓜豆歲趁隙近來學縮
頭閉門擬深谷爲公當破例握髮不待沐遣童立行沽我詩代公速
笠儕以詩來憶及揚州過從之好倫叔和笠儕詩頗有謝客逃

詩之說再疊韻奉東二公

浪跡托使府荒園但篁竹風雨少人經兩梧當軒綠同客陳先生哆
口縱橫術君偏暱就我微徑步成獨江城七年歸帆影看幅幅有語
每不吐納向槎枒腹况髯懶飲客窺甕苦無隙逃詩如逃官在城等
在谷大龍圭角奇昂首若新沐公且謀秋游筆墨焚當速

四疊韻酬笠儕倫叔

悔交文字友督責勝符竹新作連翩來明珠間結綠才高勇有餘韻
盡搜多術彭澤對賢妻舉案觴不獨

笠儕來詩作
於夫人生日

髯臂頗苦風稍稍

纏斜幅迂生近厭事飽飯自捫腹負我不關渠容卿正多隙吹毛不
落手枉費題炭谷吾欲投虎豺世且三薰沐好惡盡如斯得酒何待
速

送田魯璵大令毓璠上甯國

山民遭瘡痍休息四十載客主每相猜調御神君待况當詔興學其
奈閭多駭爰居饗太牢未習望先駭民富德可新民智愚乃解文翁
造蜀士千古欽風采山虞與林衡或宜彼岷隴田侯讀書人出作山
水宰美錦得良工刀尺動光彩五月江正深渺若泛渤澥一事最羨
君上堂猶著綵政成國人稱壽母榮應倍侯無求我規聊歌動邦家

題濠州去思集奉懷筱彭警丞裕厚

先生昔在京華日喜與吾鄉數子游誰料一麾江海去却教兩郡詠
歌留濠梁詩已哀丹帙天柱人思刻翠璆儒者當官識根本睢陽應

有泰山儔公所至以興學爲急

北看河間士馬雄當時猶盼使君東朝廷自識尹子兄晉郡邑難羈

黃次公東閣梅花懷雅宴西風桂樹報秋叢祇餘韶諫棲遲在悵望
雲霄恨未同

調常季

我昨訪君君面墨把扇大搖口默默試問君憂胡自生強笑知非出
胸臆忽然怪我前日詩不肯爲君加點劾君詩沈摯動鬼神我已望
風甘退北豈其見怒疎未諛故作斯言反相逼不然強效丁敬禮乞
取臨淄與潤飾妄欺後世誰相知此意不誠非悃愾何況與君生今
日欲舉九鼎知無力那有心情博世名聊將筆墨抒心惻君諳此理
久矣夫自命便許千秋得李杜毋非我輩人屈宋何妨來侍側行庖
釃酒月明中款婿兼呼老饕餐

常季來書言酷暑觴客爲虐政必欲相迫者請於日中臨市樓

烹羔以待蓋謔語也再以一詩柬之

袒裼相從禮數空不妨鵝鴨出家籠月明自有清風至何必高樓日正中

學務處樓可見江南山色秋日婆娑其上感題

宿雲猶在似餘醒曉上高樓百感生經雨老蟬偏激切望山秋眼尙分明喬良難得民齋盜巫祝爭陳吏祭晴羅霍風煙方浩蕩江淮潦水正縱橫

書梅宛陵集後

梅集六十卷買自武昌市刻者明嘉靖宋君巡按史屬工宣城令字大殊可喜惟其訛謬多又闕數十紙借得道光本彌月事校理所闕抄使完其訛難訂矣我思文字貴在切時與己要使真面目留與千

秋視時爲何等時士爲何等士當其入微妙不在文字裏閱歷助胸襟天姿加踐履四事不關詩詩固待此美俗士動誇古終身寄人里一體效一家自矜工莫比乞人衣百寶寶也殊足恥揚眉譏杜韓況說宋諸子告以先生詩笑口或大哆孰知六一翁低首直到趾古貨真難賣病在古入髓東坡尙嫌酸餘賢可知爾械之笥篋中我歡獨在此

和胡淵如聞詔之作

一詔喧傳墮九天歡聲先到海隅邊從來影正端由表須信冰清必是泉不向人寰分九等誰堪法界任三權君尊民貴因時用聖者原非雨露偏

淵如以長篇辱贈賦一律酬之

多君耿耿心如月照我茫茫鬢欲秋逝水從來要東注馳光誰與挽
西流直輸巧舌辭皆矜義感迴腸悒稍瘳半世交情今老大祇宜共
泛菊花甌

送陳伯平方伯

啓泰上江蘇

早年清望動朝端諫草流傳遍八寰乍接談芬沾上酒幸瞻旌旆皖
公山交情潭水深難比高節龍門峻莫攀莫怪臨歧倍惆悵書生誰
更恕疏頑

一詔驚催車騎東別離容易惜怱怱到時官閣梅初白去日寒江葉
始紅吳客聲華天下少大藩財賦古來雄公餘文讌招奇士定憶朱
游一畝宮

淵如示尙志學校菊花詩戲答一章

胡先作詩詔其徒勸爾作菊莫作蘆蘆花飄揚乃易枯菊情澹定清
且孤蘆聞斯語叫何辜我體雖輕潔不污遠隨鳧雁起天末近傍漁
釣宿陂湖無用之用古亦有荒寒寫作秋江圖近年山民耕無所多
闢江地成膏腴當其沙水隱茫際惟我最早盤根鬚世間毒少蓋萬
萬斷腸墮指傷肌膚又如當路長荆棘能使坦道成畏塗蘆也方之
功罪殊先生過貶胡爲乎姚子止蘆勿不娛菊花誠主爾說奴含醜
蓄刺妨人者法當鋤去爾則無

九月二十六日送外舅葬至范岡雜感

中興俠少年江海舌端吐老厭世間機堂堂入此土
侯高嫁女時不取文書矚成此一段奇冰清映寒玉
霜空星逾明光采當頭大雞鳴天漸高一棺松影外

葬公吾事了尚有冀州存熱血酬知己平生祇此恩

入龍眠

烏桕丹殘著子肥故山景物慰新歸白雲冒石疑龍駐黃葉從風似
鳥飛蘇軾買田良不易劉伶荷插豈全非君看壑壑豐碑滿何處青
山便許依

和倫叔六十書懷

君方少年我猶兒懷栗相從文字嬉歲華怱怱我四十君已六十夫
何爲白波作山江雨恣蒼巒侵昊寒雲癡太元覆瓿無人惜寄語方
髯漫自奇

那問兒郎臧與穀會須智辦一身周雷聲虢虢原非雨雲意濛濛總
是秋往代高賢談避世如今閉戶也無籌君家翁嫗同陶翟或許山

人耦綠疇

生女

吾年四十一得女敵得男姻黨助我喜兄嫂樂且耽頰肩走百里雞
果饋盈擔老妻臨妾房一日四五探却憶昔生兒在己及廿三當時
意氣悍那作顧影悵四方交豪俊世變稍稍諳常抱種族慮奴隸非
所甘斯民苟日智勝彼長戈戡辛勤營壇坵久覺力不堪終當避賢
去不負山中菴女爲伏勝女吾其老書蟬

丁未六月過遂園熙伯索詩漫題三首 丁未

結屋山城裏而無市井喧雜花時覆堵喬木自成園子誦九千字翁
能三百篇我從江上至疑此卽桃源

數典徵前輩爲官早罷休時時買泉石一一會春秋亂起跡如掃機

過事若流園林又在眼信美勿多求

厝火論全勢人知旦夕非我栽他日樹君鑿此山薇當宁停朝見諸
侯備禍機周身須辦智養拙欲何依

秋初小陰偕倫叔造夢霆約登東城循堞至北城而下穿菜隴
訪阮岑之時雨忽至岑之留食湯餅

魯君夢霆者今之申屠蟠惟其小異處乃不居山間魯家非無山無
錢不能買時時登廢堞獨立清風灑地偏客不到蓄爲一姓私今朝
秋意動三人忽共之煌煌熒惑星出斗復入斗毒癘流江國戎機伏
杯酒惟余三人者不問蒼生危仰頭看雲山垂目見町畦秬稻已就
穫荷葉仍滿池蒙籠紫葛花罩彼灌木枝陰深不可測遂動魯君悲
謂我風人言百歲歸其室應喪樂生心豈伊衾枕恤下城漸入市言

叩故人門客饑湯餅具客渴山茶溫飛雨集花葉翩翩向我翻花間
鳴數鳥音響若相存髯翁說茲游最勝東北角來守值名賢行見施
輪奐超然侔壯觀雪堂謝前樸翁言實過矣翁計毋乃癡縱遇蘇夫
子爲驩能幾時歸掃魯家山勿作千齡規

舒儀生廣文疎爽好客藏古甄二分其一贈余甄爲壬寅江甯

土人發墓所得文有永康元年廿日

缺一字

丹陽

以上爲一行在左側

州秣陵王氏制作

以上爲一行在右側

質作紅色甚堅古考孫權置揚

州治秣陵權又改秣陵縣曰建業晉太康三年復置秣陵縣

漢桓晉惠年號均有永康此殆晉也賦詩謝之

皖上舒生意氣遐書堂隔斷市聲譁兒能磨墨供佳客婦解治蔬作
儉家寶晉名齋真不忝輕裘贈友欲同誇獨憐嘉惠成虛辱深媿風

人賦木瓜

何事人間見此甄不堪回首永康年人疑帝座成虛器變有星妖應
上天千載廢輿固若此一卷顯晦豈徒然摩挲閒物生真感未若支
頭竟日眠

方玉山編修

履中屬題貴州石刻王陽明像

陽明洞中講學處龍場驛裏悟心時自將方寸好料理豈意功名百
代垂鄱陽縛濠如縛豕思田撫賊若撫兒儒生誇雪無用恥豈與此
老增毫釐君看方屋古鬚眉猶是人間老講師編修持圖趣我詩爲
道生平興慕思男兒三十早通籍雲起龍驤會有期

九月歸里常季招飲

門巷條然雀可羅暫歸且喜得頻過今秋中稔米猶貴往日少年鬢

欲蟠花徑傍城人跡少竹林當戶雨聲多誰家牆外方塘水試借春
栽十丈荷

至長崎

海客倦波浪見山心已融衣冠多舊製屋宇有唐風寒飯童趨校揚
旗賈獻功驚思遣唐使今古意何窮

神戶布引瀧

截水蓄冬瀑依橋結野寮山花迎戶媚小妓向人嬌景物須安置山
川未寂寥及時勤管領歸欲獻芻蕘

神戶月夜乘快車侵曉抵東京新橋姪東彥煥昂馬氏兩甥女
及其婿來迓

聯翩車走健如龍修道蜿蜒抱海東天淨竟無雲點綴山開喜見樹

玲瓏平田稻刈猶餘本遠屋茅低頗類舸犯曉橋邊甥姪迎異邦情
話勝鄉中

不忍池有懷摯父先生

盈盈不忍池中水曾照吾邦白髮翁風采能令殊域慕忠誠難化舉
朝蒙危樓高詠悲王粲薄俗虛名累孔融長夜漫漫無計且可憐陰
翳永浮空

日本報端論松花江船事徵引外舅徐棻存先生黑龍江述略
甚詳感題一詩

書生籌國托空文豈備東鄰採異聞司馬遺書無使問茂陵寒草沒
孤墳

舟過瀨戶內海作歌

自我到日本未作汗漫游箱根日光足不踐比谷上野纔一周千葉
樓上見富士屋然而高方山子彼都以此擬泰華其顛半埋冰雪裏
吁嗟江戶川當春士女來喧闐櫻花不見見枯樹一水將枯十月天
公家事有程嚴寒迫伏臘陸生誰贈越中裝管甯難設遼東榻神戶
初過始放船忽有奇情集眼前沈沈碧海不測底無數青山插兩舷
圓如覆釜尖如筍平若削椽簇若蓮偶然橫阻疑無路忽復開張境
又遷人與衣裳都綠淨碧空飛出團圓鏡似將萬類納汞中欲化魚
龍共游泳捕魚巨艇滿海中五色燈光相掩映終宵貪戀久忘吾霜
氣沾濡不辭病我聞蓬萊方丈仙所都於今已信仙人無但覺塵世
那有此境界反疑天帝偏愛東南隅茲行快事此第一作歌聊且娛
其娛

慎宜軒詩卷六

桐城姚永概

病
戊申

六合競青春蜂喧花葉盛士女集茲晨山川鬪明淨而我亦何爲書
堂空臥病萬事不得理一冠嬾自正已矣復何言存亡任天命

春風緣隙至料峭不可干初來尙不覺漸入腠理間寒熱聽彼使涔
涔頭若山藥來未必愈況向醫錢慳吾終爲病死念此摧心肝

日出可力作日入安我牀當此將頽日令人增惋傷挽之苦無力不
挽心旁皇何況西來雲侵掩難禁當區區一身謀豈少燈燭光其如
天下黑相率犯淋浪明朝縱有日不得共舉觴智者徒自苦勸君安

閨房

送孫純齋發緒赴潛山視學

往時襟被入舒潛景物逢秋潤可拈矮柏著丹遮屋角修篁引碧到
山尖別來泉石應如故此去風光想更添爲問窖麻春竹地可能容
我突常黔通伯及余三數姻友
有造紙廠在水吼嶺

君行便道游山谷谷裏今無百丈松丹嶂舊藏禪祖骨白雲時起漢
家封巖題剝蝕文能讀法字蕭條佛缺供惟有石牛堪負重八風不
動自從容

送方玉山入都

玉山舍我去正值春風時連宵動雷雨蛟龍起深池昨日枯柳枝今
朝黃金絲物色換新態君行那得遲金門多故人爲我略致辭少壯
不如人况增口上髭臨行一尊酒勿作兒女悲努力樹功績丈夫當

伸眉

題許冀塘吉士承堯黃山詩卷卽送其北上

吾嘗教黟人不一履黟縣聞人說黃山流汗慙滿面把君詩過眼如
作黃山游千峯入襟抱萬壑供雕搜黃帝鼎成去遺薪盡龍虬瀑布
似珠簾千載無人鉤不知白虹裏果有仙人不君材清且敦去去金
馬門廟堂重圭瓚林谷宜蘭蓀詩篇當付我努力康時屯

海棠

海棠花媚本輪囷四十光陰快轉輪高燄燭天張錦幕飛英貼地展
芳茵綠章通奏憐狂客黃鵠移根歎逐臣何似鄉園對嘉植百年老
屋共昏晨

歸來暫喜得盤桓不厭花前盡日看欲借壺觴消永日那堪風雨集

春殘良辰易避佳人眼
逝景難溫烈士肝
老去顛狂無處訴
且憑詩酒敵清寒

有懷外大母曹岡舊居

松徑柴門對綠疇
外家湖畔聽漁謳
歡情苦挽隨年逝
往事回甘逐想留
春草有時迷舊徑
夕陽何意照寒流
雖無去國衣冠感
已使元郎悵晚楸

練潭道上書感

棠梨花密杏花疎
物色風光慰病軀
官道著泥晴尚滑
春山藏靄淡如無
種桑日望當攀採
佩玉知難利走趨
驚撫頭顱空老大
竿船真欲泛松湖

次玉山留別韻重送之

瓊樓玉宇不勝寒一日春留盡意看此去君宜乘海運從今吾不悔
儒冠桃花浪穩河方靜榆葉風溫路豈難爲問陶然亭外水年來應
已定微瀾

倫叔用前韵譽余詩再次答

君家詩律鬪堅寒正味森森本耐看齊客漫誇吞若夢騷人自許岌
余冠孤懷不惜三言隱常語終輸一字難堪笑吾衰才筆退文章今
已卷波瀾

雨中過倫叔值月霞上人

蕭蕭梧桐雨涼潤沁坐席言訪老詩豪邂逅今禪伯年來契真如欲
出彼火宅徵心悟楞嚴起信超利益輕雷天外行浮漚階下拍師有

翠微峯更從築寒碧

月霞近營精舍於
青陽翠微峯下

馮夢華中丞 照 奉命開缺余適在里寄送十四韻

俗敝崇儒效時艱仗重臣公持天子節獨立大江濱昔歲妖星動當時衆論猶從容定奇變寬大體皇仁結主途原正經邦術有神薦賢搜谷秀轉粟活飢民惡草鋤當路芳蘭種及辰樹人百世利起廈萬間新本計培風背封章犯逆鱗謳歌千士口賢佞一尊身追趙情何極留恂願未伸灤湖波浩蕩天柱石嶙峋永叔終懷洛杜陵每憶秦一杯山嶽重此意竟誰陳

九日倫叔招觀龍湫遂至太乙山莊謁存之先生墓留飲醉歸
倫叔有詩亦成二十韻報之

城居久不適出郭意始軒偶逢故人邀遂款龍祠門是時正重九積陰天際屯微陽間穿漏終被層雲昏神像肅冠冕血酒階跡繁想當

歲少雨祭賽千夫奔飛瀑嶺上來蜿蜿若大虢中道成坎窞匯作玻璃盆
鬻也贊龍德名盛由實敦笑彼落帽人虛華匪道根君看七年旱樹焦
山石燔胡不早作計救此喝死魂何況彼蛟龍有無難具論潛占幽險地
竊尸雨澤恩古來豪傑士得時救元元不得固有命文藻被後昆軼事載
風流豈伊人所存高壘在數武是我平生尊宿草展一拜留客豐雞豚酌
竟齊物與君掃舊痕

陪周玉山尙書登迎江寺塔同游者郭子華重光韓古愚慶雲

兩觀察洪澤臣汝闈倫叔通伯月霞是岸兩上人

傑構岿蕤勢半傾共憑絕頂俯寰瀛歸雲飛鳥同千里落葉暮蟬無數聲
投老尙書腰脚健出塵尊宿須眉清吾曹試看堂堂在送盡斜陽意未平

感事

廟謨深遠費疑猜
甲帳如雲向日開
已說貸金揚國武
更煩除道待
兵來撫綏應困喬
良吏廉恥終忠頗
牧才愁絕江城三日雨
可憐足
繭馬虺隤

送葉玉澄

錫麒

之官四川

班生投筆走西域
手定漢家卅六國
葉生少日與之同
十載窮邊供
幕職買婦教蕃邊
部種爭山徑奪強鄰
色志大每遭時所棄
功高翻
歎賞猶嗇有才無
命可奈何誓欲歸耕
十頃坡自向江頭結
茅屋桑
葉青青蘆葦多蘆花
飄蕩易迷處養蠶絲
薄難當絮辛苦京華
六月
留一官又向西川去
西川嚴武今人豪
蓄眼虛心待俊髦
祝君晚達
如高適莫學溪堂
杜甫高

宿繩侯山居值雨

少小許經過一諾三十年吾生固有涯此會詎偶然寒雨起遙山偕
我及門前鑪火倍多情伴聽溜涓涓

白魚登近溪甘釀破家甕臘梅蘊古馨嘉蔬抽雪蕻晚晚美人惜瑤
華君子重清芬可百世語奴窮勿送

高樓貯手澤插架多琳瑯主人時出門負此好山光諸郎秀眉宇往
往瞰扶桑勿恨大男拙爲君守家鄉

東坡謫黃州歲作岐亭客平生陳季常萬里共几席况我與夫子縣
界一水隔雞鳴風雨晨從今勤命屐

正月十日偕金子善馬季平

振憲

游浮山方伯豈

彥忱

爲主人

未陪行而命人治具待客

已酉

茲山奇絕處不肯立江濱野艇抵崖足微徑侵石唇方志備掌故劉

記狀嶙峋謝絕車馬客留與漁樵親

方素伯有浮山巖洞志劉海峯有浮山記

和州張進士鍊藥輕棄官丹竈有遺跡白雲護深巒一朝得要妙兩

翼生羽翰吾欲求斯人高風千年間

張名同之宋仁宗時人

昔聞浮山遠名頗闕佛子或云歐來游惜無文字紀叅得九帶禪涪翁語近似此去石牛洞不能三百里

山巔一泓水清澈鑑雙瞳欲移華山蓮十丈栽其中五月雲雷興往

往見蛟龍江湖渺在望潛此安能雄

天池

嶄絕朝陽洞陽明有寄題鑿厓納半足緣葛當層梯憶彼甌山老能

開此邑蹊儒生真有用端不負鹽齏

王陽明二詩乃張甌山先生所刻吾邑前明理學傳自甌山也

外束作巖城中吟疑大甕當頭巨穴明飛瀑落兼凍刻壁紀游年低

遭水磨礱埽苔求得之聊供一笑哄滴珠洞

簷灑晴巖雨蔚傳曲洞風主人真好事饌此待游蹤雞酒破僧律笑

談開客聰因悲讀書子行上點蒼峯李光燭曾讀書金谷巖今將應李仲仙制軍招赴雲南

會勝連金谷題名半宋明大書籐宛曲細字髮鬢聞有孟公句堪

為方乘榮未知何石是睇壁獨含情謂孟郊題詩

勝游留小憾未到此藏軒老屋繁荒草遺書傳後昆學風開一代老

境遜諸髡却喜藏山集於今漸許繙方密之先生老著書於此藏軒近上海印行錢田問先生藏山

開集則先生浮渡前後集行可出世矣

半生夙賴了餘興上橋山樵路藏石罅客冠礙洞顏絕頂轉寬博非

竈蘚花班世亂民依阻吾偷此日閒

題巖幾道江亭餞別圖

都門萬車轍來去自成隊嚴候數遭逢了不異常輩茲行果何爲寫
圖寄深慨殷憂啓聖明羣士盈冠佩訂謨宜仁者昌言開蕪穢不伏
光範求豈無後車載奈何蘊不施腸熱跡反退圖中著西山壓堞橫
微黛登高望皇都夫子豈不愛坐令秦無人不聞周有賚此事又十
年舍君吾奚憖

送胡鞠生令君

汝霖移合肥

漢代重循吏時被文法傷三輔號難治其民多豪強吾邑富禮教先
輩留芬芳胡侯來一年倥偬束行裝父老從四郊爭集縣庭旁問侯
何爲去蓄意各皇皇大哉漢宣詔治久吏斯良好惡不在衆惟在否
與臧况今譽侯者市井達窮鄉此豈不足與令胡不更張柳條已青
青江流行湯湯合肥亦壯縣往矣載春光

途中

棠梨淡白野桃紅
春暖村園興倍濃
接壠菜花黃似海
香融鼻觀午輿中

新柳千條復萬條
遠連芳草碧無聊
春波欲動漁舟起
鴨子湖邊魂欲消

題魏默深詩

游山記廣徐霞客登嶽吟
狂魏默深辛苦當年陶謝手
枉雕肝腎避哇淫

幼時居掛車山中嘗作小詩爲先君子所賞
途中憶及因追存之

微風送春雨一徑入松竹
何處焙茶香隔林有茅屋

日落羣峯陰灑然涼風作獨攜古硯來向此溪中濯

送方玉山江湘嵐

峯青

吳季白

傳綺

入都

何人夜半負山趨臥榻容酣計太疏徑奪燕支無去病能迴趙璧望
相如臨江已見傾城送攬轡先聞偉論據試把圖經考興廢五松元
是漢家輿

蕪湖赭山滴翠軒袁太常官皖時所修以祀黃文節公袁死庚

子難後僧移主占作戒堂宣統元年三月余偕倫叔仲勉澤臣

吳守一

汝澄

陳魯生

文藻

同游以告今署道郭子華飭僧還其

舊而太常腸謚之命適下倫叔有詩次韻並呈子華

涪翁江海士遺跡說茲山篤古自成癖孤忠總近頑高文千載遠國
論一朝還使者今人傑風流前後間

和倫叔摩字韻再呈諸公

巨及高揚天可摩羣公詩思壯如何故緣時局推移甚頓使文章感
慨多盜寶宜從陽虎得却環肯讓國僑過區區一儉何難折豈直瀾
翻口似河

趙伯遠編脩

曾重

既和余前詩又別用銅官二字各作詩徵和

適余歸舍臥病一月重來則此議將決矣勉次其韻

平生心事薄巖終羞仗虛文動帝聰長羨冥鴻避輕繳焉能騎馬挽
強弓抗顏坐上深慚愈覆瓿身已等雄何況經旬仍病酒空尊孤
負杖頭銅

先朝侍從戀長安書憤千篇未覺難赤電頻呵原有主白雲飛占太
無端似聞壁已隨人返終恐珠難比昔完兀兀腐儒愁底事漢廷仗

下立千官

通伯屬題戴文節公臨壽道人秋江送別圖圖後有張穆書顧

萬唱和詩並自爲詩時通伯將赴合肥

儒生丁末季正類蟲著網悠悠彼何人悵悵吾安往當時顧與萬送
別秋江爽寫圖寄深衷詩篇勤贈枉山川非昔人今古閱虛像焉知
太平年風流動遐想戴畫與張書驂舞欲齊鞅乾嘉重漢學風尙誇
無兩爾幸值聖明雨露徧堯壤方矜日正中倏已烟生莽飲河滿鼠
腹擘華待靈掌勤勤薦菊盞規規守書幌一朝抉藩籬九域來魍魎
虛文與實學無用同飄蕩扶風寶此卷隙塵偷微賞示我索題詩更
發新秋榜

章錫卿教諭

家祚

今年游奉天高麗至日本考察學制歸而上

書大府數千言頗蒙激賞出示索詩

章生五十著儒冠不肯低頭苜蓿盤
躍馬經探邊塞險乘桴真覽海天
寬想因求野悲周禮聞道投書動
上官寧向伊川期及百爲戎今
有萬千端

題沈乙庵方伯

曾植寒林坐臘圖圖後自書病僧篇庚戌

萬木蕭慘人跡絕春氣潛藏根似鐵
枯莎敷座洞門深寂滅更無言
可說僧病非身亦非心異香成穗繞
雙林却憐八表同昏際願放光
明破闇陰

用山谷游王舍人園韻題天柱閣

築閣行省司地直龍山陽天晴西北望
嶽色不可藏自古賢政策在
暇不在忙沈公有道氣官居等寶坊
論徵古典籍坐集儒衣裳時流

老成淚或焚燕寢香去年江淮饑稻黍不芬芳庫藏又久空安得化
金方貸粟監河侯救此灾剝床憂多公膳減孤負數百觴世方競炎
熱誰解心清涼赫然聲利場照以明月光橫流波浩浩正色天蒼蒼
潛霍有佳境中開天地房宛委古藏書待公與意量其男多朴野爭
席魚相忘其女半高髻未知時世妝公令四境安容我接輿狂

沈公據

緯定宛委
爲霍嶽

嘉興方伯招朱仲我

孔彰

李審言

詳

來皖開存古學堂未成而

去位秋日無聊邀兩君登長嘯閣遂各有詩次韵

高樓出市酒如川檻外羣峯各獻妍正許狂吟傾座上未妨秋色逼
尊前風高鷹隼翔寥闊水落蛟龍思廣淵試看新洲鋤可把陳登應
不薄求田

赴省

行李出東郊風光淨不囂馬蹄乘晚疾鷹背負秋高喬木留殘日荒
村具濁醪漸衰便高枕湖畔問漁舸

倫叔以詩賀余生子答之

舉雄常事耳聊慰老大情親賓各有攜走賀傾山城雞豚龍眼棗花
冠間錦綳方翁獨以詩酌險苦難賡祝兒繼前美長壽復崢嶸吾知
翁有喻勿墜門風清區區襁褓物敢冀千人英積德世過三試啼頗
嗶嗶生年正值戌三甲俗所驚能如犬子不作賦開都京文字還照
世已足慰生平嘗疑洗兒篇必非坡手成無災斯可矣何取公與卿
宿彰德府大月先寄樛弟煥昂兩猶子

電掣風馳二千里徑渡黃河飲漳水燈花照眼綴釵蟲念汝明朝迎

我矣明月明朝應更圓兩翁相對寓堂前高燒紅燭照夜飲一別京
華十二年京華事事都非舊重城不閉夜如晝纖兒欲碎好家居
空強隨富奔驟此行擬作半月留新詩可散經年愁清光分照東西
海異國還知憶我不

四弟大侄任日本二侄在倫敦

劉仲魯大理若曾招游萬牲園賦贈

不踏京塵十二年重來猶喜是堯天眼中騏驥垂垂老望裏鷓鴣一
一遷獨立期公爲底柱狂談容我醉華筵康成宿草今何在更欲相

從問墓田

末謂鄭東父

西山寒翠壓修垣猶說當時帝子園新綴樓臺招笠屐遠羅飛走集
籠樊過時好菊開差晚得地高松勢轉尊噴水雙獅無一事森森銀

竹自續緜

贈通伯

與子少年交最暱知子胸藏活國術行年老大補一官猶復低頭守
經帙上書天子不得達空有雄文懸白日懿親分掌銅虎符後王所
是能爲律司徒銅臭祇等閒臥榻容酣何足惜度支歲入二萬萬突
過先朝應充溢猶聞仰屋困無謀錙銖聚得泥沙出吾儕生命付大
化行止皆天何得失殿前獻賦古所貴時非康乾世論黜季路底傷
伯寮訟子輿焉懼臧倉尼四海賢豪頗見知相從便類膠投漆男兒
得此足自雄豈異齊王噓百鎰藏身人海政爾佳歸去吾將樂圭華

上協揆華卿先生二十韻

榮慶

日月雙懸舊風雲百變新重來瞻紫氣萬感集丹宸軌道巖城徹高
樓御水湮小儒空踟躕元老故逡巡昔忝陪春宴今容接後塵士依

通德里國賴老成人與立全由禮偕來必在仁大同焉可冀小雅痛
將淪衆論當衷聖羣材應辨珉真成一閩市誰作九方歎聖祖乘乾
會諸賢啓泰辰外交通北徼修厯借西鄰家法崇濂洛嘉謀用李陳
安溪 四方無不服萬國盡來賓詞欲重華就規宜往憲遵衣冠方會
澤州 合草莽自酸辛一德期伊尹三言望宋神別離已近紀瞻對忽逾旬
久分溝中斷甘爲積下薪公能調玉燭長遣白鷗馴

和王畹香太史

蘭庭

見贈韻送之返六安

辛亥

榮官夙願薄中民長欲汀洲採白蘋守我林泉安素分看君談笑繼
英塵文章未剪籠中翮章奏期批頷下鱗何事相逢說歸好豈緣秋
興動安仁

君以御
史記名

酒座呼傭取大盆狂談不避市人喧才非捭闔心空壯膽抱輪囷血

尚溫草草詩篇記陳跡茫茫歸櫂破江痕他年重會知何地恐似蘇門阮訪孫

得方小泉丈

希孟書却寄

家國艱虞日平生父執稀一書來遠道萬里喜生歸游記應傳世高吟更入微分明江漢路愁絕十年遠

論自分朝野人難定否臧都成一閩市誰是百夫防滇嶺春無綠遼波遠更黃感時同有淚揮灑入篇章

寄懷沈乙庵先生

憶送歸腥火正流山城花鳥到今愁清尊談笑才經歲白髮江湖又早秋袖裏長閒活國手樓前應掉看雲頭近聞東馬聯翩召早晚朝廷起范歐

寄懷馮夢華中丞

芳樹盡從白傅種，嗷鴻重待次公收。
愛花人去空惆悵，憂世心長轉繆悠。
淮塞近開疏道議，國貧難作重輕謀。
青溪秋色如招客，欲問江干下水舟。

題子善秋景

柳老西風作意驕，孤蟬猶自抱疎條。
不知更有春來否，到眼秋光太寂寥。

次韻寧州中丞大觀亭巡視廣濟圩二詩

西來雪浪抵危欄，亭傍孤忠拓舊觀。
新種竹梧聊補翠，略加塗堊不施丹。
茫茫白水無平地，蕩蕩青天有暮寒。
且喜江城兵氣靜，萬家恃爾定波瀾。

山泉江漲雨如綿一線蜿蜒勢待穿
盡屏軒游來宿野却憑畚鍤竟
回天金堤波避王尊勇武衛心隨
蘇軾堅江北江南鴻百萬欲從召
父乞豐年

示韞輝

輕霜食鬢過書蟬往事依稀爾我
諳似水華年將半百如弓新月又
初三墓門衰草秋藏雉山墅枯桑
舊長蠶會學襄陽居士法無生話
就一茅庵

題鐵華詩卷

徐君天性是詩人通介遺風絕世
塵臬廡自容梁案舉盧船許救孟
巢貧鶴鴿有恨顏驚瘦龍虎相遭
句倍神可惜惜翁虛後死奇才見
應解眉顰

嘉興吳芥子

受福

藏摹本馬湘蘭聽鸝印卞玉京寫經硯柳如

是菱花鏡李香君小景硯卞硯亦刻玉京小像又求臨柳象

附鏡後題曰板橋殘照徧徵詞詩因成一律

唐鏡菱花秦篆章硯端玉貌繫興亡三吳士女多風雅六代江山易
夕陽紅粉每邀名士顧白頭知借法華藏如何潦倒汪容甫舊院投
文比弔湘

題子善畫

怪石成堆醜竹研荒寒高樹暮江邊何人與結茅亭子護取疎枝絕
可憐


劉蔚堂令君

啓

文聽鸝圖

男兒當少壯銳作萬里游仕宦既云遂時時懷故邱願爲境所繫欲

歸難自由深衷托圖畫如病對珍羞劉侯家剡谿山水天下幽卅年
百里宰一官今白頭江南與江北遺愛處處留去年來吾邑頌聲滿
道周國賦去蝨蠹山城免戈矛開篋徵題詩似有莼鱸謀大地在天
宇滄海著浮漚何者爲故鄉胡越肝膽侔不觀漢司農雞豚賽春秋
桐鄉勝子孫有德無不酬况今臘未盡寒氣塞春柔千門萬戶裏不
復聞嬌喉願侯姑置之且盡按上甌



慎宜軒詩卷七

桐城姚永概

壬子三月偶作

壬子

春歸何處尙沈陰
買醉愁隨酒盞深
鉤喙已能爲九鼎
客驅仍自養千金
學妝癡女依孃櫛
解語嬌兒識父吟
家室依然渾是福
白頭兄弟遠關心

紛紅駭綠滿庭中
花思難禁睡思濃
無賴春風狂似虎
不妨老子道猶龍
杯棹興減疎朋過
几榻塵生任網封
獨有南窗新竹筍
怒乘夜雨恣橫從

巴縣潘季約郎中清陰君子人也與余兄仲實交久矣庚戌秋數晤於京師今歲北來聞其賣屋載書歸里作此寄之

西南迢遞計鄉程獨抱圖書別鳳城江闊豚魚休作浪春歸杜宇倍
關情浮雲易逐驚塵起白日終依故國明早晚茅堂親檢校萬山深
處嘯歌聲

出門

我老倦行役其如世變何已無鴻鵠志深恐虎狼多苦縣書空著甘
陵部未和兵驕誰召汝不敢怨天瘥

犬子周方再秋來體漸強扶輿能送我索餅自依孃果熟無多啖風
高好與防嬌慈深護汝寬此九迴腸

上海逢沈乙庵陳伯嚴陳介庵陳劭吾

惟彥及倫叔

忽忽前塵夢裏除是非難執舊詩書生涯土偶憐桃梗事業工師棄
社樗谷底已無巢許迹海濱都作望夷居相逢莫問今何世燈火蒼

茫海氣初

雜詩

出門何茫茫了不似人境
豺狼當衢術騏驥步不騁
寒雅雜亂啼占此西頽景
結陳塞遙空意若流光永
惟雞具五德中宵發深警
不改風雨聲聞之祇悲哽

洪鈞運大化萬物仰其神
稟氣立恆幹自然有彝倫
燕鴻別妃匹蜂蟻知君臣
烏鵲亦何智羣飛集昏晨
斯理忽破碎物否况於人
哀哉父子親不及虎狼仁

孔子諾陽虎亦欲應公山
苟能假斧柯庶幾奠區寰
躊躇終不往豈不惜時艱
成功未可期禍患如邱轡
所貴從吾身留此萬世閑

長嘯出國門大道生秋草
秋草日以多行人日以少
繞朝贈晉策勿

謂秦無人夷吾不世出江左遂沈淪我欲求英豪恐在渭水濱爭名
市朝裏或者非伊倫

跼也膾人肝橫行天下苦展足如大箕發聲似乳虎仲尼欲說之再
拜辭不吐爾生雖美好乘時恣剽虜不自諱其行覺爾風猶古

少年抱秋心老至轉蕭索幽燕氣早寒八月霜侵幕慨焉推客枕起
步西南閣天河無客槎何處招飛鵲北斗無酒漿何以成斟酌西風
海外來狂葉紛紛落

客從海外來遺我千黃金人生貴快意行樂當及今美車澤可鑿駟
馬馳駸駸趙李日經過絲管多哀音黃金易消磨白日易蹉跎酒債
積如山焚巢將奈何周赧豈足法暴秦一何多

日落羣動息夜分氣轉清如何當此際各抱淺深情志士惜光景徘徊

徊倚前楹狹客睽佳麗酣歌彈鳴箏光景不可留容顏有時更臧穀
羊俱亡未知誰虧成不如華山叟睡達東方明

六籍不可信古人多余欺辛苦好家居碎之由纖兒六合同一塵霧
重白日述焉知天漢上自有精光垂千春若流電况此隙駒馳猛虎
矜牙爪更爲蒼生悲湯武誠可薄舜禹吾知之

驅車薄言游遠訪黃金臺蕭條易水上萬古悲風來昭王既不祿樂
毅被嫌猜曠世得一賢棄之若輕埃燕丹目秦歸大勢去難回發憤
遣荆軻餞別歌聲哀明知事不捷勝彼王建貽謀國需早計於丹奚
責哉

良史不可見但採勢利詞休文與涯餽銳志扶傾危惜哉功不遂甘
心就屠夷文宗任僚崩順死尤可疑徒觸宦者怒永爲後世嗤希文

一篇論玉谿數章詩千古弔冤魄大義稍維持竹林七子賢沈湎糟
與醜二豪議蠡起誰知我心悲

昭明著文選錄陶祇二三後來悟其工表章勤黜猶疑閑情賦白
璧致微憾湘君湘夫人千古意同暗所以東籬旁惟希甌與甌
杜公入夔湘詩境老逾妙持較雅頌篇駸駸與同調意至多苦詞光
沈無客耀晦翁頗知文於此味厥照不如山谷深片言握元嬰

團團柏如蓋裊裊花如帶先人有敝廬溪流南北會冬圃摘寒松秋
田收霜糲到枕無雜聲松風伴谿籟秦桃落人間商芝非世外吳魏
爭雄時此地駐旌旆山林失深窅何處無患害惟有白雲閒蒼蒼布

秋靄

老鳳西山棲辛苦育衆雛衆雛毛羽成不得報勤劬飄蕭將倦翮自

作稻梁圖念此五中熱頗欲效馳驅我友胡不諒嘲我逐時趨自抱
風木慟吾轡未敢紆友墓草亦宿舊盟今不渝遺詩日在眼把卷闔
且吁白日照山海精魂定有無

鳴鳩將八子一子落海渚雌雄相和鳴青春出麗語一朝飄風起中
道折佳侶文采非昔時猶爲壇坵主綢繆營戶牖拮据支陰雨平生
鴻雁行隔絕今何所虛傳黃耳書會面終成阻明年春江淥歸翼幸
勉鼓丹穴尙依然竹梧仍楚楚

去年當鼎沸不意得一兒六月漸解笑家人頗憐之暑從北方歸一
病不可醫甯無父子恩垂涕埋山陲今日已大難來日更可知辛勤
到八尺所值又何時察始本無生莊周道足師

幽蘭生絕壁偶被樵夫採擔荷入城郭市人爭求買芬芳固絕倫精

氣已潛改花時一已過棄擲牆隅在徒令深山中年年無全蕾
有情常苦悲無情太枯槁悠悠濁世中誰從解意表朝來攬鏡看不
似少年好天運有秋冬何必惡醜老但願平生歡白首永相保共此
須臾光那不惜素抱

人皆願不死不死夫何爲交游中道變恩愛座上離湛湛案前酒騰
騰鼎中脂但養新少年不養舊聾疲聾疲不適用少年空復奇奄忽
流光去綠鬢終黃泥同隨大化盡到此又焉施

偶懷梁節庵胡漱唐

思敬

治世能臣亂世奸許生早自識曹瞞甘蔗已逐風霜盡往事空勞修
竹彈

上書不報拂衣去絕類西京梅子真最痛篇終陳苦語異時逆耳更

無人

偶題

西風吹雨似輕埃零落殘芳尙亂開
秋蝶向花無意興繞叢三匝却
飛迴

偕子善伯豈游北海登萬壽山作歌

紫微垣昏無帝座金熬玉竦行人過
白頭宮監尙守門得錢引我恣
游臥萬壽山卽遼瓊華樹石蔥蘢少
塵堞高宗記有四國文築亭蓋
覆碑豐大掖牆法帖石稍殘承露銅
人盤未破雕闌繡柱半傾頽玉
几珠簾隨蕩播皆云庚子乘輿西
外國兵屯任點澆長松幸未作薪
燒宮花豈免當芻莖當時敷設直
千萬捆載徑行那敢邏於今皇帝
法唐虞持較元明猶足賀崇陵坏
土惜未復誰與招魂歌楚些刑餘

尙抱犬馬思公等能言勿辭慳我聞此語已凄然含情復續悲填咽
吾曹額本三千外今日凋零祇一千舊餐官米久停放月領公家銀
四錢太液龍舟曠不御昨來偶爲將軍牽欲求恩澤不敢說得卽歸
家學種田西山落日半輪縣宮闕依稀在暮煙枯荷折葦鳧雁集秋
風吹雨如吹絲山陽安樂以愚全唐十六宅尤堪憐世局原隨士議
遷眼前推倒三千年但使西鄰無責言阜財利用國本堅虞賓自爾
安不顛咄汝刀鋸法應捐吾亦偷生何憾焉

方伯豈仲斐招游天壇觀古柏作歌

天壇鎖鑰放三日士女長安空巷出琉璃廠內鞭影驕正陽門外車
聲疾方生邀客及衰朽微醺莫放斜陽失未到先驚勢駿雄入門已
覺情蕭瑟繞壇一碧皆種柏羅列駢生成秩秩元耶明耶世不知百

株千株數難悉陰森奪日色淒涼慘澹生風寒凜慄怪根直下渴重
泉霜皮縐裂蟠修繹真宜虎豹據爲宮恐有狐狸攫作室旁幹猶承
累葉露中枝折爲前宵颯無情樹木尙如此繫日長繩知乏術祈年
殿上望西山金碧依然暮靄間王氣已隨龍虎盡夕陽祇見雁鳥遠
往聖千秋垂教澤嚴祀昊天威百辟彼蒼視聽悉依民精意分明存
簡冊大道原爲天下公此心不隔耶回釋齋宮肅穆水環垣想見千
官助駿奔中夜燔燎半空赤連營宿衛萬夫屯五千運過蒼天死更
聞開作公園矣吁嗟乎倚天拔地之古柏留與游人勿輕摘

偕錢唐戴蘆船

克讓

子善伯豈仲斐張屏臣

家翰

東彥煥兩姪

游法源崇效二寺

法源寺裏松猶在二十五年重與對幹老能禁塞北風陰濃奪得西

山黛毅軍半占僧房居放我閒行了無礙豈緣大士是龍象果有聲
名存海內君不見旃檀苑本與屋亡天甯隋塔望門退出門迤邐西
南行清曠漸與市囂背棗花亦是唐佛宮老僧種花當種菜牡丹一
株百廿朵花開酒肉聯車載不是花時挾衆來我比東坡尤穢穢壁
誌猶存王仲堪西來小閣全荒穢摩訶翁記想朱王詩史風流成異
代後來視今似昔無橫流未必侵嵩岱文章光燄自千古老死書叢
吾不悔

國子監改歷史博物館戴蘆舸招往欲觀監中舊存古銅器至
則館長因小雪鎖庫歸但敬瞻辟雍及孔子廟觀石鼓而歸

國子無先生館長鎖庫去守門兩白頭招邀縱游觀辟雍水生蘆風
過怨如訴屏風立殿中寶座昔當御璀璨金碧坊直前無百步憶昔

盛典舉普天同悅豫觀聽近萬人惜哉吾不與更老禮竟廢驕心已
潛據譬彼木千章外盛中含蠹旁有三岐槐尙說文正樹元氏崇僧
伽淫毒及陵墓兵氣崢嶸中講席尙容布國亡教猶存豈非斯人故
民心苟不死英主固易悟大哉孔子宮率土知欽慕帝王有百易孰
敢改此度前年換黃屋未竟功忽駐雖無上雨淋恐被旁風仆流涕
向階前久立空欠欵吾聞東方學西漸勢難錮奈何同族類自滅鮮
顧慮石鼓在門內置柵與之護摩沙剝蝕餘幸免荒原露煌煌告功
文運往目誰注進士例題名茫如在烟霧飛霰集客衣驚心動歸屨
獨有柏千株虬枝猶鬱怒

鉛山胡詩廬

朝梁

伯嚴弟子也以詩卷相投題贈一章

終年鶻噪烏啼裏洗眼今朝見此詩日星有夢寄山谷塵土無痕到

牧之世論繆悠懷抱惡生涯浩蕩語言痴便約散原成三笑一醉沈
冥百不知

贈吳辟疆閩生

醉翁意氣薄雲霄曾許升堂廁俊髦嗟我見龍徒片爪看君於鳳得
全毛平津閣裏秋風勁皖伯臺前夜夢勞好向燕然求石待漢家行

事固能豪

君爲總統府秘書欲歸非
不得時有用兵外蒙之議

余摹得惜翁小像穗卿題詩感喟深至次韻時教育部方討論

尊孔事

莫笑荆高是酒人悲歌燕市豈無因不傳死矣猶留影吾道非耶孰
見真今日泰山安可仰異時滄海恐全淪九洲寄向虛空裏萬代千

齡跡總陳

膠州柯鳳孫編脩劬齋與辟疆論詩及近賢盛許拙作因有通
伯文章叔節詩之句而君近著元史不出贈詩謝之

老抱雄奇續馬班
荒園小屋意閒閒
一編識我風塵外
廿載游余父子間
回首觚稜渾似夢
閉門史藁積如山
天南地北終惆悵
已有歸心起白鸚

舊除夕作

此夕深杯酒
年年得共嘗
慙移成舊俗
客遠異歡腸
兒女依燈鬧
雞豚入饌忙
故鄉猶在眼
莫怨隔風光

由京漢鐵道南歸途中寄仲兄

春北冬南逐雁忙
白頭相對暫分張
霜風曉揭千門柳
冰雪宵梁十里黃
詩酒興能留壯節
兒童音已變他鄉
如龍如虎飛騰過
醉倚車

窗看太行

偕仲兄登陶然亭 癸丑

萬竅爭鳴昨夜風
西山全在混茫中
重來客鬢驚新白
一笑花枝似昔紅
僧換難尋高士宅
官尊能奪梵王宮
飄零杜甫傷春慣
祇恐清

樽酒易空

滿洲覺羅炳成居龍爪槐旁去亭不遠僧言廟爲陳京兆所占已久炳成死亦不知其居處

題通伯碧梧翠竹山館圖

山城斗大枕龍眠
文獻相承五百年
入座鬚眉多古貌
充囊述作半名篇
傳中耆舊音誰嗣
畫裏園林意可憐
書史滿前梧竹好
幅巾來往雪盈顛

槃君五十 甲寅

江城執手記猶童
問字交承杖屨蹤
詩禮幸逃秦烈燄
衣冠誰保魯

章縫百年中半體猶健二月方春花正濃農事待興兵事遠會攜茶
鼎和巖松

歸來

歸來理舊窩書冊喜無他洗竹潤添幹問梅香滿柯英雄王霸少天
地戰爭多却顧三雛子吾衰奈汝何

財匱雄籌困時危佛救難不眠據高枕無術媿儒冠吹角千山靜繁
霜二月寒天心與人事翻起百憂端

題通伯所摹惜翁象

先生已千載遺象喜猶傳貌有枯松古形真社櫟全江山全盛日壽
考太平年莫怪湘鄉羨今瞻更憮然

得三姪哀問誌痛

隔歲不相見詎知永別離開械腸寸斷望北淚雙垂天道甯如此浮生焉可知高堂有白髮辛苦久如絲

汝貌懸吾目吾今見汝難百年方夙駕十口寄長安手種花如錦舊批書滿丹回思車畔送忍說死生看

到省倫叔留宿兼賦二律次韻題其近詩

會合原非人力致兩翁天遣一堂來相逢髮短猶遮鬢莫惜杯空更倒罍春水波濤歸闋寂高梧日月絕風埃蓮花七寶生堪羨任爾風輪次第推

多生慧業知難盡况有名區助異觀謝傳祠荒情浩森夏王陵古勢擎盤青山長往脚腰健白髮孤吟天地寒媿我讀書三十載案頭瑩火浪教乾

贈葛溫仲

溫仲乃繩候女壻末二句謂繩候新葬

葛子溫溫者風稜囚不羣買山得水石築室通風雲自學養生訣能
逃濁世紛十年如一日立羨夫君

竹輿乘首夏相值皖江湄偶出宣城紙求書舊日詩朝來晴定未老
矣去何之不見新阡起蒼茫使我悲

贈宿遷臧雪樓

增慶

我友半爲子所友初逢便作故人看山城夜雨添江淥幕府清風生
夏寒埋骨孤軍懷舊烈論交千載有新歡堂堂留得鬚眉在莫媿當

年管幼安

雪樓叔曾祖牧庵先生咸豐中援桐城殉節城南有碑

次冀平見贈韻

君才拘怒不可律下筆蒼茫百憂集縱橫大句在長篇清婉閒情歸

短什自憐已作秋蟲悲近抱尤如春蚓曲平生老友舍車翁騷壇盟
主久無敵閉門獨草子雲玄斷句似讀連山易鐵華弢庵周代文淵
如季野商人質西海足供夸父飲不周敢效共工觸昨者索詩今者
來見譽過情戲太劇我今忍辱學苦提巨浸不濡肯從溺北望猶餘
一念存未等彭殤時太息三舍自甘此日避十年更養垂天翼不須

窮我使添愁再說橫戈當衢術

來詩云不然寢甲更十年飛艦航空
假于翼呵斥八極等微塵再伴天人

術談戰

再次前韻答冀平感近事

市人雅鵲聲同律白璧無奈蒼蠅集豺虎猶知不受譖巧言自古垂
風什我持故山雲腴來澆子詩腸令回曲不圖招得伏波軍據鞍顧
盼萬人敵素箋兩日已三疊句健安能一字易昔者臬比真濫擁虎

皮非分蒙羊質易世謂宜江海忘深文未許藩籬觸蜉蝣朝暮我易
待蟻螻蔽天渠已劇儀舌雖存早倦游韓灰不然胡用溺大官迺與
腐儒爭正如張楚臨凡息故人不作青白眼力任解紛予卵翼君不
見道旁驕犬喜咋人雲裏冥鴻智多術

長沙陳慎登

朝爵

榜寓齊曰不繫舟胡淵如爲書之皖中士夫

各贈歌詩余與慎登同游迎江寺慎登歸成詩索爲賦之

我見慎登貌記在辛亥前我讀慎登詩修復甲寅年君貌頗如枯松
古君詩乃作幽蘭妍四載波濤揭天地蛟龍百怪垂腥涎疾雷破山
水飛上天轟闐而起忽闐止變化不可言語傳慎登處之心寂然一
舟不繫隨風旋還鄉作客平等視因物付物忘家禪胡子大書壁上
懸羣公投詩爭後先中間豈少黃苓曲恐泥跡象非真玄咋者聯袂

浮屠顛江山清麗洲邈緜歸成俊句更督迫提毫復閣心煩煎方叟
格高抗杜叟程生長律殊芳鮮新知老友各如此敢對巨敵橫戈鋌
雲收驟暖衣汗黏陰晴不定吁可憐哀貽麗姬何有焉幸君早解南
華篇

次趙春木繼椿見贈韻

高齋下榻更浮觴共看秋雲沒太陽蕭瑟留聽三日雨從容與展一
生狂當時杜甫思除草此日陶潛悔種桑藜杖偶因行散出投詩翻

累故人忙前半乃辛亥秋事辛

春風簾捲吟紅藥早擅才華似牧之重倒清尊拘客飲喜無橫氣見
君機雲烟作態終成幻邱壑藏胸未厭奇少讀殘書猶未了閉門已
悔十年遲

鐵華因病戒詩爲余來特賦一律次韵奉酬時端午無龍舟故
末語及之

已分空山枕石眠又來郡郭看雲煙江波不與英雄逝塔影依然書
漢懸興發故交爲破戒酒酣今日是何年湘纍未許揚雄弔簫鼓無
聲白浪顛

鄧叔存以蠶哀治尊君繩侯先生家訓成冊屬題深夜繙讀感
歎成詠

燈火虛齋向案青故人細札語丁甯僧虔誠子惟勤學高密傳家有
舊經士壘行看松矗矗門材喜見玉亭亭百年清德承何易渾潦終
存世典型

去年晤蒿庵先生於滬出示新詩余亦以拙作呈覽辱蒙題詠

近始獲讀奉懷一章並寄乙庵先生

去年謁公歸梁燕初引殼今年思公時牆榴紅吐縹篋中百韵詩七十公自壽歷叙平生踪傷今復悲舊我有草根吟正思有道就辱荷薦蒼璧遂掩鹿皮陋昔者德星聚歲在未申候公與沈嘉興旌節欣輻湊陋邦得大賢士氣若饋餽龍歸雲亦散天意味難究小草尙依山大詔不思殼春渚少潛鱗曠野多哀獸永叔思洛陽良時不可又

喜雨投劉令君

啓文

三王德既邈橫目無人憐牛羊任肥瘠所賴牧者賢珪璧郊徂宮此義載詩篇奈何逞橫議壇坫廢牲牲去秋三月旱數省民無饘春麥久待刈又傷寒雨連吁嗟一線命望此秧入田三分方插二龍睡無人鞭有時元雲興微點霏輕煙風來吹醜之欲訟誰司權劉侯中宵

歎朱榜張市廛禁彼羊豕屠逝將告吾虔精誠果上通簷溜鳴奔泉
想見四野外白水滿新阡邦人視吾侯久如家人然願待百寶成築
亭記豐年

次潘季野泗移居韻

辛苦遺經無地巢數莖白髮等閒拋喜君有屋能容膝何計成氈費
刮毛早晚看山休獨往歌呼隔巷許相招種花買竹終吾世未必秦
人策始高

賁初居士贈貓索詩

禮重迎貓等祭虎虎食田豕貓捕鼠春來鼠擾不成眠買得狸奴頗
魁伍十日嬉游一日歸飽輒酣聲動前廡倒甕翻盆百不知但勝朱
泚獻同乳故人憐我數篋書五世丹鉛寄辛苦覓將俊物與護持文

采班班照環堵便似尼山得仲由鼠輩從茲莫余侮

贈裴伯謙

景福

卽題其詩集

萬里黃河寫入懷如君蹤跡頗奇恢世傳南海多神異人羨東坡有
吏材夜靜虹生顛米舫秋高風起粵王臺一官丹荔黃蕉底十五年
前似夢回

走馬昆崙雪壓鞍懸腰孤劍與爭寒山川雄異開詩境身世蒼茫到
筆端君幸生還看世變我從死友得新歡太沖賦自三都貴作序何
須待士安

張子駒

家驩

今年銳志作詩出語驚人辱荷見贈久未有報又

承招飲次其重九均贈之

我老遘陽九豈任中風走長安歸兩年周旋賴親友藉彼珠玉華掩

此藜藿醜浩歌送日月頓忘窮居久斯文如大澤百獸依其藪量腹
隨小大各自滿升斗古來聖哲徒一一開戶牖麗有漢都京奇稱元
測首悲憤少陵什醇淡淵明酒光芒耀天地不與浮榮朽道衰文獨
昌翻幸天子厚張生相業餘家風承五畝篋藏叔皮書耦得康子婦
書堂新展拓雜植具花柳向來不作詩一出驚富有此才更十年吾
軍能左右時時袖巨帙令我避居後夜吟醒醉眸朝諷開笑口腥臊
野戰龍妖變天墮狗寒儒愁浪抱將軍腹空負和詩更就君今日醞
佳否

通伯近收吾縣方水邨先生隸書東坡和陶詩三章後有方植

之東樹朱歌堂雅吳正恂庭輝馬元伯瑞辰及外王父光粟

原諸先生題詩裝爲卷子屬題方先生名應乾明季遺老嘗

捨宅爲金粟庵自號金粟頭陀

淵明自抱義農慨百世東坡識此心出處不同風味似固應山谷是知音

捨宅爲庵擬半山白頭更寫和陶篇低徊二百餘年事過眼風燈憶昔賢

道咸諸老遍題詩學行文章各擅奇自把深情書卷尾盛衰微覺異當時

慎宜軒詩卷八

桐城姚永概

到京三日送方孝遠之甯夏並寄許冀塘 乙卯

噓氣鬚成冰十年寒未有我來君戒行離腸寫杯酒君行更西北萬
里單車走黃羊飮冰盤白鹽堆雪阜古來邊荒地今已同戶牖所托
况親知辛苦應未負儻逢許丁卯爲問詩多否我老憚長塗羨君好
身手

贈李曉耘 國柱

李生曉耘者貽我一卷詩披讀到深夜昏眸捕蛟螭壬子詠史章字
字皆瑰琦欲曉苦不易此語耐百思弱冠已如此後來自可知妄譽
信尊匏掘衣質蝨疲前日期市樓卒卒竟忘之師丹固老人今未及

彼時我豈武安哉君亦非魏其文字異勢利知不成嫌疑相忘在江湖古心照肝脾

乙卯脩禊十刹海分韻得同字

辛苦一涔水照我少成翁堤柳數十株青意仍濛濛言懷永和人勝事千載同賓主集高樓履舄翔虛空簫韶音久絕豈有日再中今辰不自樂誰爲開余衷陋哉王右軍胡獨感無窮

徐又錚填詞圖樹錄

君年十四爲諸生當時鄉井早知名作文屢驚學使者拔送高材不肯行十八投身入軍府上書萬言動府主多多益辦本天成一見知非憎等伍懷藏韜略世不如七年猶問海東居朝騎富士山前馬夜讀睢陽架上書詞人宛轉情依舊按譜翻成皆錦繡玉田工整少精

奇白石森嚴遜華秀歸來天地入蒼茫竦身直上雲霄旁腰間如斗
高官印襟上銜花殊錫章畏廬老人頭半白淡黑圖成舊吟宅危樓
百尺水邊明高柳千枝風裏碧卷中題詠多耆耆馮鄭皆吾昔者友
徵詩也復到鰕生豈具黃鐘思瓦缶大范胸羅十萬兵碧雲紅葉尙
多情從來虎嘯龍吟客不廢雛鶯乳燕聲

述懷三十四韻贈王晉卿

樹梅 裴伯謙

吾年十四五趨庭西山中挾書從兄讀大義時多矇伯也獨早世抱
志恨未終遺經仲篤嗜白首寶殘叢漢宋說紛如一一會其通兩姊
適馬范范詩馬文工小子都弗如培塿配華崧門內顧尙爾敢當天
下雄去年遇裴子一見情先融出詩逾千首噴薄萬丈虹高者窺少
陵次亦蘇長公謂我盍序諸既成心忡忡新城富篡述名久聞至翁

季冬到燕京幸得談笑同不請序我文假借語胡豐賢者豈溢與子
或自由衷吾親有盛德綱外錦在躬高文表遺壘巨石行求礪惟此
兩君子昔同貢南宮吏名南北齊所至活疲癯新城帥諸侯裴翮剪
不狃握手銅駝陌那計遭汗隆江南舊解元分止王羣童樂事專師
友東鐘應西銅大范後吾伯墓門長蒿蓬生存勤會合爪惜泥上鴻
吾如泛海人適遠資椀蓬舟師肯佐佑待吹六月風泰山忽傾頽涇
渭流交濼樂亡禮又失生民將爲戎吾非孟韓徒可息羣言訐師彼
嗣宗慎卷舌深閉囁人生哀長勤翻羨逝者侗會合誠足喜亦復悲
無窮

乾隆時常熟孫訥夫先生以知府從征準格爾遣母喪不得歸
哀毀卒於土室中初先生得異石名曰佛雲伴喪歸里咸豐

時失於兵裔孫雄裝池先生小畫成册求林畏廬李梅庵補
畫其石附之徵題

家山在萬里作畫當看山奇石忽飛去補寫青玉環畫山忠孝人補
石兩蒼顏嗟爾石可補補天知已艱

師鄭又徵題翁文恭公手蹟

老去虞山獨閉門相公功罪不堪論殘箋剩墨風流在留與千秋伴
淚痕

吳少畊廷佐五十徵詩次諸人韵

五十居鄉雖未杖逢人庸敬半呼兄青春得酒無奢望白髮聞歌有
異聲從古空山增鶴力幾時世議定蟾羹我歸試述燕京事易水今
無古慶卿

知本無涯生有涯偶然托足便爲家
征塵幸守先廬小榷酒難從私
釀除明月蚌胎天道在春風鳩杖
母餐加只愁問事煩他日
挽到鬢

鬢短可嗟

少畔須少
故以相戲

次磐君凌寒亭韻亭前立雲石是張氏勺園故物

閱盡興衰二百年亭前片石獨蒼然
梅簷花繞天孫錦竹徑枝鳴帝
子絃北嶺生雲疑屋上西風麀暑去
尊邊公能老此甯非福只盼霜
清稻熟天

蘇毅叔

行均去年以詩題余近作次韻

少抱秋心不受憐吮毫欲到古人前
三千詩滿牛腰裝九十穉鷓鴣
磨邊此日樂憂兒輩覺當時墨費
老夫研故人期我黃花候伴東
籬一粲然

次雪樓喜再見韻

南歸已負看花時握手重裁歡喜詩幽處共期修竹節深情欲續斷
荷絲驅車海內多岐路學易君家有大師不食那能妨井渫勿教吾

水等閒茲

牧庵先生
有易學

聞胡敬庵近狀作此寄之

世與吾曹風馬牛先朝老令又何求校書事恐羞元亮賣藥人猶識

伯休春簞宜將雙料酒

酒出
黟縣

秋風莫憶五湖舟石魚舊約年年負笠

屐吾終與子儔

石魚山
在黟縣

過孫文園

吳

去年食君梨虛腹得軟飽今年過君家枝頭淨如埽君言鄰少惡每
伺天中昴緣牆捷類鼠瓦墮夢被黽行修憎多口味甘爭探爪混混

一世中何用矜美好

磐君題六安何子翔乘飛艇俯大海攝影五古讀之有感

鳥亂於天魚亂淵深山麋鹿不成眠君知禍水由茲否棄智同尋大願船

寄李光炯

德膏

遙岑吐明月照見湖中廬閉戶聞天籟鳴榔和讀書不妨神冥合箒與世長疏欲涉無津水思君情有餘

高養社

景祺

乞作其大母毛太夫人賢孝詩

璧珪從古習雷電感金滕忠孝神攸許天人蟹若鷹焉知匹婦節上有古人徵弱質遭多難衰姑病未興藥憐丹鼎竭翦向玉肌扔堂上春初轉牀前豎又憑微詞通碧落夜禱對金繩香與魂俱返鸞隨馭

上昇妾身甘瓦碎夫命得川增運祚門今大朱丹轂競乘人心疑禍
福帝謂報雲仍列女方編傳名應青史登

題師曾槐堂圖兼寄散原老人

蜩翼無聲葉半脫空庭容得老槐活其旁醜石兩三拳瘦筠依之氣
不奪風塵何處有斯堂陳子借自武昌張哦詩作畫輒竟日但怕夜
寒更漏長散原先生今老矣青溪屋破西風裏三年未見一書無想
得高懷如止水昔君爲我圖西山西山今在有無間君家靖廬歸不
得人生適意無南北

收用遺山法
改半山句

題填詞第二圖

徐侯閉戶覓佳句句成林叟命毫素畫中厓屋淨無塵隔谿尙有樓
堪住徑絕風雲自往還前圖臨水後圖山雞蟲何與猿鶴事便欲相

從老此間

舒彬如

鴻儀

宜園本克勤郡王物殘於庚子之亂彬如購而葺

之自爲之記

老言自勝強多欲無一可項王蓋世氣田父給之左城西舊朱邸樹石殘兵火舒侯得一角經營成婀娜自言勤樹菝那計食其果但令還舊觀人得吾豈叵君賢誠遠矣及此非瑣瑣內重外自輕萬物皆么麼不見有虞氏天下何與我受堯乃付禹鼓琴二女媿

又錚畏廬欄秋詩廬及張少浦

伯英

塔式古

齊賢

張仰韓

慶琦

梁次楣

上棟

陶仲芳劉紹松

汝柏

林奏丹

凱

以余五十邀泛

淨業湖觴於昌邑陳明侯寓中翌日畏廬作圖記之又錚賦

花犯裝卷相贈諸公續有詩文因賦謝七章

匯通北枕淨湖隈水有菰蒲岸柳槐兩代興亡消得否西涯死後幾人來

羣屐風流盡世英偷閒邀作泛舟行當筵頗有須眉古却喜諸賢愛

老人

是日並招朱仲我馬通伯及仲寶

畏廬文字筆巉巖閒畫荒寒水一灣荷葉打完蘆葦淨斜陽樹杪看

西山

挂壁良弓暫輟彎十年厭草檄如山吹簫自度江南曲城北徐公不
等閒

胡子詩追黃與陳小林記躡大林塵臧侯不語張侯語下筆應須泣

鬼神

奏丹作記詩廬少浦均有詩礪秋能詩而不爲

殺賊何如斷佞臣孤忠不與董曹倫夜闌壁作蛟龍吼畢竟甯南是

可人

明侯藏左良
玉寶劍一

少年意氣欲凌雲老向詩書自策勳
羸得霜髯似坡竹看余袖手過無聞

客有言近時談文頗尙梁體者戲成一絕

丙辰

秦皇漢武久消亡魏晉元風亦茫渺
巨手元和猶未見祇應相對話蕭梁

題畫

真山不免金銀氣巧奪豪爭起大瀾
何似畫中山最好斷無塵土到毫端

贈臧礪秋

蔭松

京師號人海求友各有曹輕車載年
少意氣豐英髦礪秋何爲者獨

喜親霜毛吾文偶一見嗜若左手螯敦勸印千本傳之天下豪校讐
驕陽中却扇汗黏綸媿非揚馬作胡以稱子勞昔塗經芒碭龍虎氣
未韜會當起真人一釣十五鼇六合盡清宴重瀛息奔濤發抒萬古
憤鴻文紀禹臯吾甘牖下老子應雲閒翺茲編奚足言祇配秋蟲號
合肥段公將枉顧敝廬余以僻遠先往待於林畏廬家以止之

因成二十韻奉酬高誼

猷壯資元老才微愧大賢虛傳車騎貺自覺屋廬偏世已輕荀孟時
方尙慎田道謀爭築室橫議各張卷踴躍客分部吁嗟民倒懸魚游
沸鼎水鱷吐吮人涎論昔艱無匹惟公敬所先棟支僑不壓梁在楚
終還往歲風塵起崇朝歷數遷大波秋盛漢寒日晚頽燕甘守山林
拙長懷金石墜柳眠辭露浥花落任風顛坐擁遼東榻家餘子敬託

白頭今日恨青眼古人編問字羣童集鍼詩故侶聯潛夫無論著處
士有王前鬪將東西海佳兵南北天何當銷畛域從此免戈鋌行止
關天命存亡托仔肩萬方回泰運一畝願終焉

題徐相國

世昌水竹村圖

越人種篁每成田依山傍水青相連中原此物古不乏風詩所載惟
淇園朱傳徑易毛氏詰後儒攻討何紛然漢武塞河寇恂箭誰言通
望無嬾娟先生卜居百泉尾蘇門七里時招延門前罷亞十頃田清
溪繞屋花連天平生每羨東坡語苟非大力烏能專交陰接葉三十
畝籜龍手種紛連阡出圖命我賦寒碧媿無大筆如脩椽先生活國
如活竹身退猶爲天下牽風雨飄搖存牖戶深宮能令孤兒全胡爲
懷此一片土司馬獨樂何有焉深抱與人不易測功業過眼如雲煙

水濡火熬皆俗子藐姑冰雪斯真仙會須携酒相就醉臨風太息懷

三賢

次均壽陳弢庵太保七十

御河冰解紋縠交衣冠神武罷宮朝白頭太保獨晚出凜凜青松寒
不雕黃羅昔受先后託豈比印繫尋常腰翟芴齊眉同七十春蘭秋

鞠期非遙

公生於九月夫人同歲生於三月

公子徵詩助燕喜長篇雍容短寂寥回

頭却憶六年事萬弩不射錢唐潮靈光歸然獨公在禁門已散當時
僚張良尙有韓可相肯顧黃石山前要君臣各以時立義大哉帝德
侔唐姚

題吳溫叟

諫青溪夜泛圖

萬古青溪水須眉閱幾人不知朝市改但解媚芳辰一棹疏煙外相

携綠酒親畫師取空闊著意在無塵

周養安

肇祥

篝燈紡讀圖

廉吏不可作妻孥寄萬山當時微母力應早化夷蠻燈影臨機杼書聲動闐闐夜烏啼不息催取鬢絲班

兒幼母心碎兒長母命終明明天上月永夕起秋風圖畫留遺影文章記苦衷不妨補黃耳危日爾能忠

記載番犬由欽州走番吾相從不去

湯定之示其曾王父貞愍公

貽汾

詩冊詩寫於道光壬子多記

水灾有柬先大父一篇句云寒鐘動故宮殘夜知同醒憐君

鄉思搖苦我愁魔梗時先大父寓四松庵也敬題長句兼寄

倫叔詩窟圖倫叔所藏

丁巳

我昔曾觀詩窟圖心諾題詩久未報先生詩窟不尋常司空土室名

同謀一時詩畫擅聲名四海賢豪投紵縞西南烽火迫江來大節從
容仁義蹈文孫新獲自書詩以我通家又見告殘夜有人能共醒愁
魔應爲蒼生滂當時憂樂在天下不比羣兒漫相好四松詩窟今何
在動地橫流勢尤暴吁嗟鳳鳥久不聞頑鷲誰信大師導故里麥田
作龜塢西川城郭焚於盜剝床灾已近肌膚抵死不知渠豈旣定之
寂寞客京華詩畫能追先世奧獨我衰情對此編搖搖恰似風中蠹

答畏廬次韵

君以無田歸未得我田無歲豈能安前塵杳邈十年逝新句淒涼五
月寒老去情懷思止酒平生骨相不宜官須長鬢短俱如此射虎南
山大是難

再答畏廬次韵

鷺鷥巢空聚衆狼何曾一念到農桑天心幸救三春旱江淮聞雨橫議
思翻萬古綱數卷殘書陳北牖兩間老屋臥東岡家居免被織兒撞
不羨成都有草堂

丁巳六月作

深宵一詔太倉皇挽日虞淵意可傷餘燼未全歸有溺真人不比起
南陽搯吭孤旅輸心腹覆手諸侯自肺腸太息西南消息異可能終
免作螳螂

復辟事起避地天津四弟獨留京師戰定重入城相見賦此示
之

倉卒登車去艱危棄汝行居然同一飯不意得全生僵柳知難起飄
風莫與爭憂端隨喜至盜賊尙縱橫

陳龍川

聖人不可見霸者出亦偶苟能濟生民何妨撫九有今之豪傑士日攫黃金走試問國與民念及幾微否毋怪陳龍川日與朱爭掎漢祖及唐宗朝朝不去口

臧孫

古人重實行後以名相競竊位魯臧孫空言駭百姓名實一已漓聖神資謔柄轉令帝王業不起儒生敬快哉御叔言雨行安用聖

寄二姊

四載不相見風雲有萬岐兒孫貧作累門戶老猶支暑雨滋苔逕江流入稻陂艱難誰助汝吾媿脊令詩

京津道中聞蟬

雨歇蘇蟬翼微吟碧樹顛不辭聲苦切誰解抱芳妍客鬢迎秋老離
陽待月圓義和吾怨汝何事向虞淵

燈歌

短檠燈點菜子油兩草奢覺逾王侯十年借汝光明力萬卷容我勤
爬搜而今石油光不爛琉璃隱電室璀璨惜哉我眼已生花安能坐
對長侵且山窻蕭蕭風雪寒黃茅蓋屋暖且乾深宵把卷腹忘餒祇
有千古胸中蟠人生快意惟心亨多事誰教萬里行石油光好電更
好不及當年燈火情

四弟寓宅雜花猶茂

吾弟五年寓京華新移僻巷無高車昨宵巨礮飛空過風韻未減庭
中花長瓢注水竹作架辛苦使汝明如霞貴人堂塔列千種根枯便

棄同菅麻蒼生尙不入夢想仁及草木甯非賒澤中瘠與溝中斷使
我臨風三歎嗟

謝又錚貺旅資

久信君囊無盜泉解裝念我突難黔子輿受贖原非貸仲叔逃肝亦
太廉世有英雄存老物願回日月照窮檐年來苦覺遺經好著論潛
夫更欲潛

寓樓夜起有感

隆準虬髯不再興水深火熱聖神孫川流浩淼東歸恨天意蒼茫北
極尊齊失固難矜楚得虢亡安敢許虞存危樓徙倚禁風露滿眼山
河客斷魂

憶西山故居

昔者幽居嵐翠中白頭親健弟兄同巖前花好留春駐嶺上雲晴與
雪融夜犬聲稀逢道泰新籓價賤屢年豐山廬此日誰開徑留滯天
涯已作翁

過金鰲玉竦

猶是長虹跨杳冥當年禁籞許人經風翻荷背鱗鱗白雨浥松鬚鬣
鬣青菹裏龍蛇秋未放澤中蕉鹿夢誰醒盈盈一水寒侵鞞牆外吹
笳不可聽

道中寫懷

清風習習雨霏微眼底京華去若歸薄醉不溫秋士面新寒先上旅
人衣枯楊司馬悲生意芳草王孫悵落暉無那黃金輕一諾未容便
飽故山薇

答倫叔

我携妻兒歸復出赴幽燕白髮走道路不爲他人憐中途逢方子留
醉枉長篇下及襁褓物上憶束髮年此酒既不薄此意尤拳拳我居
縣東門子居郡南偏出門必相念所造必子先棲我深院楊送我夜
江船諸郎叔視我茶果爭羅前同異姓渾忘賓主分肯蠲吾聞三百
旨一情所纏綿子真富性情吐語由茲妍樹古花更好厓峻石逾堅
夜闌出新橐一一牟尼圓小雅道盡廢父子胡越然君臣與朋友人
合何有焉子勿悲中國亦勿憂華顛區區爾我間人道賴以全種棘
不爲松植藕必生蓮烝民有懿德秉自蒼蒼天

贈虞仲仁方孝深

虞方甥舅親各擅一樓勝風帆案上過鳴榔枕畔聽來往有高人登

臨動詩興我欲借蒲團敷坐學僧定

題姚慎思

振孟

蘭菊同芳圖

春蘭秋菊無終古此語聞自楚人辭嶺南故有秋蘭種乘暄竊發無
足疑近來陰陽多錯亂怪事亦到鳩江湄東籬燦燦黃金滿幽香忽
吐春山姿故人讀書三十載抱橐老作女郎師行脩當有鬼神鑒家
瑞或蒙天地私隕霜不殺李梅實春秋災異書非時禎祥妖孽杳難
測對君歡喜撫時悲

合肥劉石宜

啓琳

以母夫人寒燈課讀圖索題三年矣倫叔通

伯代爲敦迫旅窗歲暮成此應之

平生頗聞劉石宜會合無由比鷓壓石宜念母寫成圖索我題詩報
久闕爾年壯大始居喪傷哉我乃初垂髮耳中懿行得傳聞夢裏儀

容半恍惚行年三十五無父是時睽隔如胡越楚山叢叢漢水深一
劬未容訣臨歿讀書萬卷不能子那怪皇天酷降罰把君圖記肝鬪
崩拊心何語對君發甘泉遺象空涕洟瀧岡待表無年月祇期各守
墓門耕死便長依窟早措

孫文園於縣中學鑿池築亭

戊午

故國絃歌地新營紫翠間池收春澗水亭納隔城山世變無終極斯
文付等閒登臨易怱悵廉陞要人攀

摯翁已千載遺象在茲堂昔起歸與興思裁小子章有烏終可白何
草不皆黃待挽江河水同傾蘋藻觴

晉卿得介休郎氏所藏兩漢魏晉宋古博數十手拓並題長句

徵詩成十四韻

咸陽縱火秦宮焚漸臺抱斗漢闕楮燃臍莫救洛陽燒賣履誰甘銅
雀寡中原從此暗胡塵空向江南談五馬千門萬戶都何在那許閭
闔存片瓦殘塼幸有文可讀留待後來好事者郎君搜集王君收寒
雨打窗手摹寫漢書堅朴晉姿媚竟月摩沙不肯捨吳翁康父丈人
行古塚荒壇勤兩踝著爲塼錄數十卷專門學令吳兒哆翁名廷康
桐城人
與君同耆翁今亡惜未相逢早結社工裁技巧物究極陶人亦自能
風雅范土無方日苦窳翻借鄰材成廣廈乃知大巧來從拙萬事波
靡皆苟且區區一物見興衰斯文毋怪江河下

盜發晉宣帝陵取頭骨貨外國賈

傳來怪事悲兼喜野史充箱無此詭冢中枯骨二千年復見頭顱行
萬里八王手足自相夷一龍猶說牛家兒地下阿瞞應拊掌七十二

墳今尙疑

張勺圃得家八世伯祖聽翁所畫山水跋云在茲兄訪我龍眠
深處有約偕隱於其別也寫此贈行以爲息壤勺圃徵詩已

未

黃蘗山房翳碧蘿龍眠深處得婆娑先生投老當明盛故侶相期有
澗阿蒼狗白雲天上變青山紅樹畫中多前朝遺墨君收取莫換山
陰道士鵝

李一山

汝謙

得唐拓武梁祠畫像殘本朱竹垞以下題詠甚夥

一山招飲出觀索詩因賦長句

唐拓漢畫世所罕李君得之頗自慶竹垞留題到今日二百餘年盛
歌詠雖然劫火有燒痕文字未滅猶端靚洪氏摹存大半無僅十帝

王四孝行乘人肩背夏祚亡借口持爲天澤病日月經天百寶成豈
因秋旱損明盛第知非桀不譽堯一暴安能掩九聖君看鄉里無賴
子投筆便思專國柄虎狼百萬出山林吮血磨牙起爭競詎操掘器
澹民灾况說垂旒四方正竹垞題云由黃帝至舜圖皆服冕禹操掘
地器冠頂銳而下卑殆禮所云毋追者桀
以人爲車故象
坐二人肩背君臣既喪父子隨生人未免成梟獍曾閱萊蘭幸獨
完神鬼護呵疑有命主人飲客出珍秘松花魚共冰盤淨酒闌捫腹
腐談生付與時賢足嘲評

悼金梅生 承光

畫筆詩篇夙荷薪買鄰傍我見情親菊籬樽罍成陳跡藥裹刀圭怨
海人文祿兒傳他日業白頭翁隔帝京塵鶴鷓急難輕千里夜雨牀
空應愴神

磐君元日大雪出邑北門爲詩和者至百餘篇寄余索和

歲朝被酒尋荒徑懸厓冰雪開詩興萬人和起一人倡佩玉瓊瑤滿
清聽自古知音要識真可憐韓子務祛陳寒流若許春長在我亦支
離偃蹇人

再寄

迷陽迷陽塞四徑狂歌欲止周流興區區一簣障江河力匪孟韓誰
入聽龍眠谷口鄭子真猶能不廢太倉陳題詩寄遠張吾軍愧此風
波不定民

暑歸次前韵柬磐君

閉門永日苔封徑寂寞更無把酒興積雨生涼枕席清隱隱轟雷夢
中聽雲窗霧閣事非真一念紛紜萬象陳門外三車須自度可憐終

不載痴人

倫叔去冬寄四絕未和來書致怨次韵謝之

郵中詩與札同披老友多情致怨思飲到菖蒲人不見石榴開上最高枝

久看世態眼如冰賴有多羅解鬱蒸胸裡自消蠻觸戰牛羊滿野孰揮肱

梧桐滴乳藕生花正是江頭居士家江月再圓能一笑荆茅翦盡路甯差

拾得支機作枕眠媧皇不補沒情天漫疑戶大嫌酸酒誰見雲龍有和篇

